

## Basef Ifimba Bu'wafi Mak Nanda'afi

### **Basef bandafi Maki**

- 1:1-13 God nasapa' Jon nagapisi'as embeli na-gafi'i  
 1:14-13:37 God nasapa' Jisas nawalipasa basef ananifi  
 14:1-15:47 Jisas name' akafimi ma sandolana sagahana lawag usi'igai ti'wanaegai  
 16:1-20 Jisas nosafel wapani naso'asa maol alipi-si ananisi

*Jon nagapisi'as embeli nawalipas basef Godi  
(Mt 3:1-12; Lu 3:1-9,15-17; Jo 1:19-28)*

<sup>1-2</sup> Basef ifimba bu'wafima Jisas Krais, Nogamana Godi. Basef ifimba fandasefel fataga si'i anona profet fowa'inai Aisaia nanda'ef fagail buki.

Aisaia na'i basef ifimba na'amba, God na'i, "Ina' neme". Owagama ae' esapa' anona aman nogofa'o basef ae'afii nili' nofe'ma ina' nondondomba ufia'w ine'ikwi.\*

<sup>3</sup> Anep itap wafigima fataupigima malogol anona amani, anaf ni'i basef na'amba ni'i, 'Ipa' pendondomba ufia'w Dembinaii kondafe' usi'i'w. Ufiawa ananiwai kondafe' hilili'i' . . .\*

<sup>4</sup> Jon nagapisi'as embeli nafe' anagon wafigima fataupigima nawalapa basefa amam nematawa hiasi na'ipas na'i, "Ipa' pewa' alafugaha waf awafi

\* **1:1-2** Ais 40:3; Mal 3:1; Mt 11:10    \* **1:3** Ap 13:24, 19:4

pembema nelelemba God pefa' baptaisa God no-gakwaha waf awafi ipe'ifi okom mogaso'anaf.  
<sup>5</sup> Ea' esis hiasi sagape anep itap lu'upa Judiai saloma amam nematawa hiasi sagape Jerusalami safi'mai Jon sa'i seme' basef ananifi. Ea' sawalapa waf awafi esis sanda'afi, Jon napis'i'as walemb Jordan.\* <sup>6</sup> Anen nala anom klos sanda' auf anom mafis lu'wami kameli sanda'am, ea' nowaho' let sanda' agwahup mafisina sanda'anai, na-gundisam. Gwa'aisi naga'asi na' gwamu'wis saloma aupimbel alupumi.\* <sup>7</sup> Anen nawalapa basef na'i, "Anona aman atiasi nigi' nugafi'ii, anan banagonai nikila' ae!. Ae' ina aman bu'uwai ma egatagwaha mandalefa su ananimi, owa!. <sup>8</sup> Ae' ipisi'ipa embel atembal, apa' anen owa!. Anen atiasi nese'epa Ambal bu'unai Godi nogape opalef ipe'ilifi nomon."

*Jon napis'i' Jisas embel  
(Mt 3:13-17; Lu 3:21-22)*

<sup>9</sup> Afamba Jisas nakwaha Nasaret anep itap lu'upa Galili a' nafi'i. Jon napis'i'ana walemb Jordan. <sup>10</sup> Jisas nakwaha embel walemb nandagiai atin, owa' nati heven nandawisi' alihina, ma anen, nati Ambal bu'unai Godi nafi'mai anen si'i amil alamba apa' maga'i ma'unai nufia' nisila'mai anen.\* <sup>11</sup> Ea' anagol malogol ga'i gatagai heven ga'i anif basef ga'i, "Ina' Nogame ae'inai. Ae' okom mohafel maimailina a'owa!. Ea' okom ae'ami bo'oma ina!."\*

---

\* **1:5** 2 Kin 1:8; Mt 11:8    \* **1:6** Ap 13:25    \* **1:10** Sam 2:7; Ais 42:1; Mt 12:18; Mk 9:7    \* **1:11** Sam 91:11-13

*Satan nagwamba Jisasa nonda' wafawafi  
(Mt 4:1-11; Lu 4:1-13)*

<sup>12-13</sup> Ea' Ambal bu'unai Godi nofa' Jisas nafe' anagon fataupigima mafis atom alupumi magalutuma nimaguf 40-pelaif, awin si'ini du'wanini. Owa' Satan nafi'i nagwambana. Ma ea', amom ensel mafi'i mumafi Jisas matopalopana.\*

*Jisas nasefela maol anep itap lu'upa Galili  
(Mt 4:12-17; Lu 4:14-15)*

<sup>14</sup> Afamba amom manda' Jon nanda' kalabus, Jisas a' nafe' itap lu'upa Galili nanda' maol nawalapa basef bu'wafi Godi na'ipasef\* <sup>15</sup> na'i, "Nemaf afamba felefele' afetaga ma epes hiasi sogawis nomona maol Godi nope Dembinai nugumafias. Na'amba ipa' dei' pendewa' alafugaha waf awafi pembema nelelemb pihapifa basef ifimba bu'wafi."

*Jisasnofala amam biamibiam ma mogaila anini  
(Mt 4:18-22)*

<sup>16</sup> Jisas naila akata nafe' atin dumb lu'wambi Galili, nati amam biam Saimon naloma owamana Andru. Amom mala anembeh mowafa agof manda' bisnis.\* <sup>17</sup> Ea' Jisas natolom na'ipam na'i, "Ipa' pifi'i pihapila basef ae'afi pila ae'. Fowa' ipa' pewafa agof, apa' dei' ihmiba'mepa pefe' piga'ipa anis epes pefa'asi sogaila ae!"

<sup>18</sup> Ea' mame'ana makwaha anembeh ha'oh, amom mailana a' mafe'. <sup>19</sup> Ea' nindiki'ah nafo'o felefele' akata nati Jems naloma owamana Jon, Sebedi nogaopana. Amom biam matoma bot

---

\* **1:12-13** Mk 6:17 \* **1:14** Mt 3:2; Ga 4:4 \* **1:16** Mt 13:47; Lu 5:1-11

mape mosambala anembeh amamimbihi. <sup>20</sup> Owa' Jisas natolomnofalam kwafalis mame'ana. Ea' mohafel kwafalis makwaha ahamam naloma anom manda' maola anini mape bot, amom biam maila Jisas mafe'.

*Jisas natofa ambal aunai nagape anona amani  
(Lu 4:31-37)*

<sup>21</sup> Jisas naloma alipumi ananimi Jemsi Jon, Sa-monni Andru mafe' Kaperneam mape. Nemaf afamba esis Juda sagapoma noma'wafi sabat, Jisas nao'wam mafe' mawis ipat Juda sandako-lasatai ea' na'ipasa basef amam nematawa.\* <sup>22</sup> Esis same'basefananifi ea' gogolalasis kwapete' endilisi. Anen ina nawalipas si'i amam falafumi maga'ipas, owa'. Anen na'ipas dindinip si'i anona agilinai naga'ipas. Amom magawalipasa mu'uli Godi ina mawalipas na'amba si'i anen, owa'.

<sup>23</sup> Afamba anona aman nepe nalomas ipat atamba, ambal aunai napaona ea' kwafalis atin ambal anamba noga na'i mehip na'i,\* <sup>24</sup> "O Jisas ina' Nasaretinai, ina' nafi'i na'i nenda' maina apa'? Nafi'i ma negahambombagapa? Ae' egawena ina' aman bu'unai hilili'i Godi."

<sup>25</sup> Ea' Jisas ninifalom na'i, "Ina' ambalip awinai, sopama malogol kwahowa aman anamba fo'o."\*

<sup>26</sup> Ea' ambal anamba aunai nakoto' anen kwapete' nanda'am go'ala mehip nakwahona nawisi nafe'. <sup>27</sup> Ea' amam nematawa hiasi gogolalasis sandakoto'ma ea' sanda'ipama sa'i, "Amamba main da'im? Ifimba anif basef

---

\* **1:20** Mt 4:13 \* **1:21** Mt 7:28-29 \* **1:23** Mk 5:7 \* **1:25** Mk 9:26

dambaifi? Anen natofa ambagof awami na'ipam si'i anona aman banagonai. Hiahaom amamba hiami maloma ambagof awami wapani mame' basefana makwaha epes mafa' mafe!."\*

<sup>28</sup> Ea' basef ifimba ma maol Jisas nanda'ani fafe'agon hi'alagon walemb hiagoma bagape nomona itap apamba lu'upa Galili.

*Pita nandagi'mo'wi awasi'w alop nifip ea' Jisas nanda'akw bo'okw*

(Mt 8:14-15; Lu 4:38-39)

<sup>29</sup> Jisas naloma alipumi biamibiam ananimi mosafel makwaha ipat Juda sandakolasatai ea' usi'im mafe' wambel Saimoni Andruí ea' mawis ipat amamutai. Jemsi Jon wapani mafe' malomam. <sup>30</sup> Ea' esis sa'ipa Jisasa Saimon nandagi'mo'wi awasi'w kwa'oh, alop akwa'upi nifip. <sup>31</sup> Ea' nafe'ma ako'w nahapila lagol akwa'ugili NASA'ma'w. Ea' aowas inimba nakwaho'w nafe' ambo'okw, kwanda'masas gwa'aisi esis.

*Jisas nanda' amam nematawa aowas nanda'asi bo'wes*

(Mt 8:16-17; Lu 4:40-41)

<sup>32</sup> A'i owa' wambomota awin newala naso', esis sofa'ai isimba aowas nanda'asi saloma anis ambagof awami magapaisi safi'mai Jisas. <sup>33</sup> Ea' esis hiasi sagape taun inimbai safi'i salutu felefele'ma uta ipat sili'ak.\* <sup>34</sup> Ea' Jisas nanda' amam nematawa hiasi aowas naninani nanda'asi bo'wes, natofamasa anom ambagof awami magapaisi ea' sataga bo'wes. Ambagof awami mogawa Jisas

---

\* **1:27** Mt 4:24   \* **1:33** Mk 3:11-12

anen nogamana Godi. Na'amba nasopama malogof ambagof amambai afasopam be' mape.\*

*Jisas naso'asa basef nafe' itap lu'upa Galili  
(Lu 4:42-44)*

<sup>35</sup> Wafilu kuhimbita atota akot ata' tail, Jisas nosafel nakwaha ipat atamba nagapoma. Anen atona nosafel nafe' anamba wafigima ea' nape nanda' betena God. <sup>36</sup> Saimon naloma anom alipumi ananimi mosafel matimana owa', ea' molaomana magi'mana mafe!. <sup>37</sup> Molaomana mafe'ma matolona ma'ipana ma'i, "Epes hiasi solaomena."

<sup>38</sup> Jisas nagwamam na'ipam na'i, "Ata' diamaso, afa' ata' ofe' analemb walemb daialemb hiagoma bagape felefele'i. Ae' ata' i'ipasa basef bu'wafi esis. Maol inimba atin ae' dei' afi'i."\*

<sup>39</sup> Ea' naso'asa basef nafe'agon hi'alagon walemb hiagoma agol lu'wagoma Galili, naso'asa basef bu'wafi nomon ifagw Juda sandakolasugwi natofamas ambagof awami magape anis epesi mandahi' mawisi mafe'.

*Aman aowas aunai nanda' alop ananipi pagambu'wi, Jisas nanda'ana bo'ona.*

*(Mt 8:1-4; Lu 5:12-16)*

<sup>40</sup> Owa' anona aman aowas aunai nanda' alop ananipi pagambu'wi, nafi'i felefele'ma Jisas nindiwa nembawa notawa na'ipana dindinip na'i, "I'i ina' ni'i aho' netopalope ma egataga bo'owe."

---

\* **1:34** Mt 14:23; Mk 6:46    \* **1:38** Mt 4:23, 9:35

**41** Ea' Jisas nati anen uwahipina nando lagola nasagol anen na'i, "Ae' a'i aho'ma ina' negataga bo'wena."

**42** Ea' dei' atef aowas anamba nanda' alop pagambu'wi nakwahona ea' bo'ona.

**43** Jisas nasapa'ana kwafalis na'ipana dindinip\*

**44** na'i, "Ina' a' nefe' ni'ipa anin epen ni'i ae' anda'ena bo'wena, owa'i. Ina' fo'o nihimba'ma alop ine'ipi ma aman anamba pris. Ea' nese'ana hiahaom amamba anen nondolalima God ea' ina' ninifelona ma nagataga bo'wena si'i mu'uli anan nagaso' Mosesani naga'i. Ama amam nematawa hiasi sitilina sogogawa aowas ine'ini ahi'alan."

**45** Owa' owa'atin. Aman anamba na'ipasam mafe'agon hi'alagon amam nematawa hiasi sogawa amamba ma anen nagataga bo'ona. Ea' Jisas ina nefe' nawis anambel wambel ma naep hiasii, owa'. Na'amba hiasi sifi'i sososopamana. Ea' ina nawis anambel wambel lu'wambili, owa'. Atapina nepe anamba wafigima atogon. Bola esis amam nematawa sagape ganiganii safi'mai anen.

## 2

*Jisas natopalopa anona aman aowas nanda'anai lagufi bo'wagah sagaga'anai ambo'ona  
(Mt 9:1-8; Lu 5:17-26)*

**1** Anif nimaguf fafe'ma main, Jisas notanima nefe' Kaperneam. Ea' esis same' basefa anen a nafi'i nepe ipat. **2** Amam nematawa hiasi sandakolas ipat atamba nagapautai asi'ita dogw. Na'amba uta owa' anagon nogal kwasakwasala ma sofe'

---

\* **1:43** Mk 3:12, 7:36; Lev 14:1-32

sogawisa. Ea' nawalipasa basef ifimba bu'wafi. <sup>3</sup> Owa' anom amam biamibiam manda' belita malai aman anamba lagufi bo'wagah sandahapi-manai mofa'ana ma'i mofe'ma Jisas. <sup>4</sup> Owa' ipat asil'itama amam nematawa hiasi salutu sili'ak, ea' ina anagona mofa'ana muwis mogafe' fele-fele'ma Jisas, owa'atin. Ea' malota ipat ilif ande'etama mapisila bogwan ilif mapa belita mala'ana nowalai nomon Jisas nagalutuma.\*

<sup>5</sup> Nogota atamba Jisas nati amom a' nogawa amom mahapifana ma'i anen banagonai ma nogatopalopa aman anamba aowas nanda'anai. Ea' na'ipa aman anamba na'i, "Ina' open ae'inai. Waf awafi ina' nanda'afi ae' akwahomenaf hi'alaf."

<sup>6</sup> Ea' anom dembami magawalipasa mu'uli Godi mape mame'ana. Nelelemb amamilimbi awalemba basef ananifi. Na'amba amom nomonas salasafe' ma'i,\* <sup>7</sup> "Dei' maina Jisas naga'ias na'amba? Anen nanda' God findiwana. Owa' atina anona aman la'ifinaima nogakwaha waf awafia. Maol inimba God atona nanda'ani."

<sup>8</sup> Jisas nogawa nomonas isimbai amamisi ea' na'ipam na'i, "Dei' maina nomonas ipe'isi sagape na'amba?" <sup>9</sup> Dei' hiahaom maim ipa' pa'i ahifima ae'? Ae' banagiwai ma i'ipa aowas nanda'anai iga'i, 'Ae' ekwahomana waf awafi anen nanda'afi, a'a i'ipana iga'i nosa'ma alahis ananisi nosafel nogafe'. Basef ifimba ma nogasa'ma alahis ananisi pa'i amamba ahifima ae'. <sup>10</sup> Ae' a'i ipa' pegawa ae' ataga open egefa' alop epesi, la'ifiwai ma egak-waha waf awafi hiafi amam nematawa sagape

---

\* **2:4** Lu 7:48    \* **2:6** Ais 43:25; 1 Jo 1:9

itapi sanda'afi. Ae' a'i ihmiba'mepa ae' la'ifiwai ma enda' hiahaom amamba."

<sup>11</sup> Ea' na'ipana na'i, "Ae' a'ipina, ina' safel sa'ma alahis ine'isi fo'o ipat ine'itai."\*

<sup>12</sup> Ea' esis salutu satolona sati anen kwafalis nosafel NASA'ma alahis naga'ihisi a' nafe'. Ea' amam nematawa hiasi gogolalasis kwapete'as, safela agol Godi lu'wagol sa'i, "Fowa' apa' ina mati anom si'i na'amba, owa'atin."

### *Jisas nofala Livai*

(Mt 9:9-13; Lu 5:27-32)

<sup>13</sup> Jisas notanima naila akata nafe' dumb lu'wambi agilimba Galilii. Amam nematawa hiasi safi'mai anen na'ipasa basef bu'wafi.\*

<sup>14</sup> Jisas nosafel nafe' owa', nati anona aman Livai, Alfius nogamana nepe ipat sogofa' takisa. Aman anamba nogofa'asa takisa amam nematawa hiasii.

Jisas nofalana na'i, "Ina' fi'i nila ae'."

Ea' nosafel nafe' nailana. <sup>15</sup> Jisas naloma alipumi ananimi ma' gwa'aisi ipat Livaii maloma amam hiami awami. Anom mogofa' takisi, anom manda' waf awafii maloma Jisas ma' gwa'aisi. Amam amambai ina mahapifa Jisas, owa'. Mailana dowaf.\* <sup>16</sup> Ea' amom dembami magawalipasa mu'uli Godi amom Farisi mati Jisas na' gwa'aisi naloma amam awami maloma amam amamba mogofa' takisi. Ea' mahali' alipumi ananimi ma'i, "Dei' maina dembinai tisa nepe naloma amom mogofa' takisi maloma amam amamba manda' waf awafii maga' gwa'aisi atogon?"

---

\* **2:11** Mt 9:33   \* **2:13** Jo 1:43   \* **2:15** Mt 11:19; Lu 15:1-2

**17** Ea' Jisas name'am na'amba na'ipam na'i, "Isimba aowas akasi ina sofe'ma dokta, owa'. Esis bu'wasi. Apa' isimba aowas nanda'asi atis dao', safe'ma dokta. Ae' ina afi'i ma egefala epes isimba bu'wasi sagape hilili'i, owa'. Ae' afi'i ma egefala isimba sanda' waf awafii."

*Waf afamba amom Farisi maloma alipumi Joni mololama gwa'aisi ma mondabeten atina God  
(Mt 9:14-17; Lu 5:33-39)*

**18** Anef nemaf amam amamba alipumi Joni maloma anom dembami Farisi mololama gwa'aisi ma mondabeten bu'wani. Ea' anom amam da-iam mafi'i ma'ipa Jisas ma'i, "Dei' maina amom alipumi Joni maloma amom Farisi mololama gwa'aisi ma mandabeten, apa' ine'imi owa' mololama gwa'aisia?"

**19** Ea' Jisas nagwamam na'i basef waminif atin na'i, "I'i anis sonda' anis gwa'aisi lu'wasi ma anis aman nemata'w bias sondaso'amai, ipa' pa'i esis alipisi atiasi sololama gwa'aisi isimba? Owa'atin endilisi. Nemaf afamba esis bias sondaso'ama, alipisi asasisi sonohas sea' gwa'aisi solomas. **20** Apa' anafa anis daias sofa' aman anamba nagaso' nemata'wi nogafe' laogon dao', esis sololama gwa'aisi, apa' dei' ata' owa'atin."

**21** Ea' Jisas nanda' anif basef waminif atina luwaguf na'i, "Ina andeande'ma pegatopa' lowaf namifi pesambalef fegaloma anef lowaf apifi, owa'. I'i penda'as na'amba, atiasi lowaf afamba namifi fendatagwah fehape' apifi bolotaf a' notaga lu'una."

**22** Ea' na'i anif wapani na'i, "Apa' ina anin epen nakolo'wa embel wain dambaini bewala

agwahup apinai memeina si'i botol, owa'atin. I'i anin nenda'am na'amba, embel wain netef hian, nohape' agwahup anamba pepe'etana wain kolo'olam awasim hi'ilam. Na'ambai owa'. Anin nakolo'an agwahup dambainai atona."

*Nemaf sabat Juda sagapoma noma'wafi*  
*(Mt 12:1-8; Lu 6:1-5)*

<sup>23</sup> Anef nemaf Juda sagapoma noma'wafi sa'i sabat, Jisas nafe' nawis anof aof sagawa witafi si'i raisi. Ea' alipumi ananimi mafe' malomana mosaga anom wit magaifi ma'am.\* <sup>24</sup> Ea' anom dembami Farisi ma'ipa Jisas ma'i, "Neme'. Alipumi ine'imi manda'as na'amba ma main? Amom mosambala mu'uli ma nemaf afamba magapoma noma'wafi sabat."\*

<sup>25</sup> Ea' Jisas na'ipa amom Farisi na'i, "Ipa' pegawa basef fagape Baibeli ma waf fowa' dembinai king Devit nanda'afi. Afamba Devit naloma alipumi ananimi gwa'aisi akam nolom magaham. Ipa' pegawa basef ifimba ea!.\* <sup>26</sup> Nemaf afamba Abiatar nape dembinai pris nagali'ma amom prisi, Devit nolom mahana nawis ipat Godi na' bret atamba mondolalima Godatai. Mu'uli ape'ini lu'wani na'i amom pris atom mea'ata. Anis daias owa'i. Apa' Devit ina nagi'ma mu'uli inimba, owa'. Anen na'ata nanda'ata naso' alipumi ananimi ma'ata atin."\*

<sup>27</sup> Ea' Jisas na'ipam wapani na'i, "God nali' nanda' epes ea' nagi' na'ipasa nemaf sagapoma noma'wafi sabata nogatopalopas. Ina nanda'

---

\* **2:23** Diu 23:25      \* **2:24** 1 Sml 21:1-6      \* **2:25** Lev 24:5-9

\* **2:26** Diu 5:14

epesa sogaila basefa sabat, owa'. Na'amba alipumi ae'ami mogosaga witi ina manda' waf awafi, owa'. <sup>28</sup> Ae' atowe ataga epen egefa' alop epesi ape dembiwai ma hiahaom hiami. Ea' ape dembiwai ma nemaf afamba sabata iga'ipipa maol main andeande'ma pigaila basef penda'an nemaf afamba."

### 3

*Jisas nanda' aman lagol gondola'anai bo'ona  
nemaf sagapoma noma'wafi*  
(Mt 12:9-14; Lu 6:6-11)

<sup>1</sup> Anef nemaf Jisas nafe' nawis ipat esis Juda sandakolasatai, nati anona aman lagol awagilinai nape. <sup>2</sup> Ea' anis sala' solaoma basef kwamaifi ma sosapagana sonda'mana kot. Ea' satolona naep paipailana ma siti nonda' aman anamba bo'ona nemaf afamba sagapoma noma'wafi a'a owa'? <sup>3</sup> Ea' anen na'ipa aman anamba lagol awagilinai na'i, "Ina' lutu la'afena naep hiasii."\*

<sup>4</sup> Ea' Jisas nahali'as na'i "Mu'uli lu'wani ape'ini na'ias na'imama? Apa' monda' waf fasifi nemaf afamba sagapoma noma'wafi a'a monda' waf awafi? Apa' monda'asa motopalopa esis sogape andeande' a'a mohambombagas sogaga!?"

Owa' esis ina sa'i anif basef, owa!\* <sup>5</sup> Jisas nasa'ma naep natilis tulif owa', nogawa esis opalef maso' sandaiwa'ma sogame' basef. Na'amba okom ananimi wandafuma esis. Ea' nati esis uwahipis, na'ipa aman anamba lagol awagilinai na'i, "Dowa lagol ine'igili."

---

\* 3:3 Lu 14:3 \* 3:4 Jo 11:33

Ea' nandowagol gataga bo'wagol wapani.\* <sup>6</sup> Ea' amom dembami Farisi mosafel mafe' maloma anom amam mini'ap Heroti, ma'i basef mandame'maefa moha Jisas nogaga'!

*Amam nematawa hiasi sunduwa'anima sape felefele'ma dumb lu'wambi*

<sup>7</sup> Jisas naloma alipumi ananimi makwaha wambel ambalemba mafe' dumb lu'wambi Galili. Ea' amam nematawa hiasi safi'i walemb hiagoma Galili safe' sagi'mana.\* <sup>8</sup> Esis safi'i hiagoma. Anis safi'i walemb hiagoma Judia, anis safi'i Jerusalem, anis safi'i itap lu'upa Idumea, ea' anis sagape walemb Jordan gani wa'ili saloma anis sagafi'i walemb bielimbi Tairi Saidoni, esis hiasi safi'mai anen. Same' basefa hiahaom Jisas nanda'ami, na'amba safi'mai anen.\*

<sup>9</sup> Ea' Jisas na'ipa alipumi ananimi na'i, "Amam nematawa hiasi sape. Na'amba a' sofafa'asowe. Anota bot tola tosasae ma ilita egatoma."\*

<sup>10</sup> Ea' sogawa anen nali' nanda' epes hiasi aowas nanda'asi sagataga bu'wasi. Ea' isimba aowas nanda'asi sanda' bambasi'ma atin safe'ma anen sahapilana ma sogataga bo'wes.\* <sup>11</sup> Ambagof awami magape epesi mati anen mogawana, ea' mowa ma'oh felefele'ma anen opafunama, ea' mofalana ma'i, "Ina' nogamana Godi." Nogota mamahotama ma nemaf afamba atef magatolona manda'manam na'amba atin.\* <sup>12</sup> Ea' na'ipa ambagof awami dindinipa amom ina mowalapa anen mi'ipasana mi'i anen nogamana Godi, owa'i.

---

\* **3:5** Mt 22:15-16 \* **3:7** Mt 4:25 \* **3:8** Mk 4:1; Lu 5:1-3 \* **3:9**  
Mt 14:36 \* **3:10** Lu 4:41 \* **3:11** Mk 1:34

*Jisas nandandepa alipumi ananimi 12-pelaim  
(Mt 10:1-4; Lu 6:12-16)*

<sup>13</sup> Jisas nefe' nondowasa' halafuta, nofala amam amamba anen okom maga'iami mafi'mai anen. <sup>14</sup> Ea' nandandepa amom 12-pelaima mope mogalomana atapima, nosapa'am mefe' mogowalapa basef. <sup>15</sup> Na'ipam naso'ama banagami ma mogatofa ambagof awami magape epesi.\* <sup>16</sup> Amom 12-pelaim nandandepami, agofuma amamba. Saimon agol wa'agol Pita,\* <sup>17</sup> ea' Jems nogama Sebedi, naloma owamana Jon, naso'ama agof wa'agof Boanesis. Agol agalemba kofagogola na'amba, nogaopa otaga diwagalai. <sup>18</sup> Ea' Andru, Filip, Bartolomyu, Matyu, Tomas, a Jems nogama Alfiusi, a Tadiusi Saimon. Aman anamba Saimon anen mini'ap Seloti. <sup>19</sup> Ea' Judas Keriotinai aman anamba nefe' nagawalapa Jisasa bousii.

*Anom ma'i Jisas nanda' maol naloma Satan  
anagol agol Belsebul*

*(Mt 12:24-32; Lu 11:14-23, 12:10)*

<sup>20</sup> Jisas nefe' ipat ea' esis hiasi safi'i wapani. Ea' naloma alipumi ananimi ina ata' ma' gwa'aisi, owa!.\* <sup>21</sup> Esis wambota Jisasi same' basef ifimba ma anen naloma alipumi ina ma' gwa'aisi, safi'i sa'i so'wana. Ea' sa'i, "Anen ambagof awami manda'ana dei' nahaga nagaol."\*

<sup>22</sup> Anom dembami magawalipasa mu'uli Godi mapani Jerusalem mulianai mambaso'am ma'i,

---

\* **3:15** Jo 1:42   \* **3:16** Lu 9:54   \* **3:20** Jo 10:20   \* **3:21** Mt 9:34, 10:25

Jisas natofa ambagof awami ma banagami anona ambal aunai mamana agilinama Bielsebul.

**23** Ea' Jisas nofalai amom maf'i malutu fele-fel'ma anen na'i anif basef waminif atina amom na'i, "Satan ina notofa anen atona, owa'atin. **24** I'i anis analemb walemb hiagoma esis atis sondatopa' biafisa sogapa', ina atiasi banages, owa'atin. Esis sandawal biafis a' owa' banagesa. **25** I'i anis anota wambota sagape ipat atototai sondawal mini'ap biafipa sogapa', esis ea' sandatopa' biafis, ina atiasi sope banages, a' owa'atin. Ea' sandawal biafis. **26** I'i wambota Satani sondawal biafis sogapa' atiasi wambota ananitai banages si'imama? Owa'atin. Satan wapani ina banagona, a' owa'atin."

**27** "Anona aman ina banagona nef'e nuwis ipat anona aman banagonai nagapautai dowaf nonda' wala hiahaom ananimi, owa'. Anen ata' nili' nombalo'ana ma nowa'ana sisihina dao', anen banagona nuwis nonda' wal nogofa'i hiahaom maga'oh ipat aman anambai."

**28-30** Amom magawalipasa mu'uli Godii mambaso'am manda' findiwama Ambal bu'unai Godi ma'i, "Anona ambal aunai natopalopa Jisas nanda' maol ananini."

Ea' Jisas na'ipam na'i, "Endilisi atis ae' a'ipipa, atiasi God nokwaha waf awafi fafifafi hiafi feloma basef findiwaifi hiafi amam nematawa sanda'afi hi'ilaf. Apa' epen ami nenda' basef findiwaefa Ambal bu'unai Godi, God atiasi owa'atin endilisi ma nogakwaha findiwa anamba aunai ma epen inimbaia, owa'atin. Findiwa aunai atapina nopain dei' nef'e anaf wapani, atapina Nope."\*

---

\* **3:28-30** Mk 6:3; Jo 2:12; Ap 1:14

*Ma'mana Jisasi kwaloma owapana ananimi  
(Mt 12:46-50; Lu 8:19-21)*

<sup>31</sup> Afamba Jisas naloma hiasi sape salomana ipat nomon. Ea' ma'mana kwaloma owapana ananimi safi'i sataga salutu ipat ando'. Nomon asil'igina epes. Ea' salutu ando' sa'ipa anis sawis sa'ipana sa'i Jisas nuwisi ando' nefe'ma esis. <sup>32</sup> Ea' isimba hiasi sape sagalomana sa'ipana sa'i, "Ina' neme', ma'mena ine'ikwi kwaloma owapena ine'imi salutu ando' sa'i solomena si'i."

<sup>33</sup> Ea' nagwamasa basef na'ipas na'amba na'i, "Ma'mai owape ae'asi ami?"

<sup>34</sup> Anen nati esis amam nematawa sape sagalipana na'ipas na'i, "Piti ma'mai kwaloma owape ae'asi isimba. <sup>35</sup> Epes mamahisa sigaila okom Godii ma sonda' waf ananifli, isimba ma'me owape hanitiame ae'asi."

## 4

*Basef waminif atina anona aman nogowaha  
gwa'aisi si'i raisi anof aofi  
(Mt 13:1-9; Lu 8:4-8)*

<sup>1-3</sup> Anef Jisas nasefela maol wapani nanda'an nawalipa amam nematawa hiasi felefele'ma dumb lu'wambi Galili. Ea' esis safi'i salipana sape. Ea' nalota natoma anota bot tagala embel dumb ambambai, apa' esis sape akata felefele'ma embel. Ea' nasso'asa basef hiafi waminif atin na'ipas na'amba na'i, "Ipa' peme!" Anona aman nafe' nowaha olemb witimb si'i raisi anof aof.\* <sup>4</sup> Anen nowahemb nafe', anemb bewa uchia'w sagafe'ma ea' amiguf fufia' fafi'i

---

\* **4:1-3** Mk 3:7-9; Lu 5:1-3; Mt 13:34; Mk 4:33-34

fa'amb. <sup>5-6</sup> Anemb bewa itap otambaipa, itap ina lu'up, owa'. Kwasala'up patoma ilif atogon owa' pewala awina, ea' batagai kwafalis apa' masilimb ina bewafa bewala itap atep, owa'. A'i owa' awin natafi ma owaf faluwi fahamb, otamba bega'efamb alimb. <sup>7</sup> Anemb bewala la'afena mandelef wandafumi mataga malomam maofana wit, ea' ina malo andeande' mail mola gwa'aimi, owa'. <sup>8</sup> Ea' anemb bewa itap bu'wapi, ea' bataga lu'umb, bail bela gwa'aisi. Anona nola 30-pelaimb, anona 60 apa' anona nola 100-pelaimb."

<sup>9</sup> Ea' Jisas na'ipas na'i, "Ipa' aligah hagagali-pai ma pagame' basef ifimbai, peme'ef andeande' ukup pendapomef."

*Jisas naga'i basef waminif atin  
(Mt 13:10-17; Lu 8:9-10)*

<sup>10</sup> A'i owa' maina Jisas atona nepe, alipumi 12-pelaim ananimi maloma anis sape sagalomani safi'i sahali'ana ma basef ifimba waminif atini. <sup>11</sup> Ea' nagwamama basef na'i, "God ea' nihimba'mepa basef kofagefa fape fandambahi'i ma epes sogawis nomona maol bu'wani ananini nope Dembinai nugumafias. Dei' God ea' nihimba'mepa basef ifimba kofagefa alihif. Ipa' pame'ef pegawef ea'. Apa' esis isimba sogolalama Godi, owa'atin. Esis same' basef waminif atini atif.\* <sup>12</sup> Ama anif basef fagape Baibeli fandawalap fa'ias faga'i,  
'Esis anaf sotologon, apa' ina siti anin mae, owa'.

---

\* **4:11** Ais 6:9-10; Jo 12:40; Ap 28:26-27

Ea' esis sogahembe' seme' basef, apa' ina sogawa kofagefa,  
 owa'atin. Ama esis ina sogawa basef kofagefa sombema  
 nelelemba egakwaha waf awafi asasifi,  
 owa'atin.'

*Jisas nawalapa basef kofagefa ma aman nogowaha gwa'aisi olembi*  
*(Mt 13:18-23; Lu 8:11-15)*

<sup>13</sup> Jisas nahali' esis na'i, "Ipa' owa' pegawa basef ifimba waminif atin doko' aga'ipipafia? Atiasi ipa' pelafa basef waminif atini hi'ilif pi'imama? <sup>14</sup> Dei' aman anamba nogowaha olemb gwa'aimbii, anen si'i anona naga'ipasa basef Godii. <sup>15</sup> Ea' olemb ambamba begewa ufia'wi si'i anis sagame' basefi, owa', Satan nafi'i nelefata basef ifimba God nagaso'asef nelelemb asasilimbi. <sup>16</sup> Apa' anemb bewa bafe' anagon otambraigimai, ambamba si'i anis epes same' basef Godi sofa'efkwafalis sandagalamef.\* <sup>17</sup> Apa' isimba si'i masilimb owa' bewafa begewala itap awinia. Esis sahapilif nogota bandata ma a'i owa', anis amam nematawa sandaiwa'ma sagahapifa basef Godi sanda'as findiwas sahas sanda'masa waf awafi ea' kwafalis atis sandahagas sakwaha sagahapifa Godi. <sup>18</sup> Anemb begewala mandelef wandafumi la'afini, ambamba si'i anis same' basef sailif safe'!\* <sup>19</sup> a'i owa' hiahaom nimanimi maloma hiahaom esis satolom kowagalasami baso'ami maloma moni uga maina esis sa'i sogofa'ami hiami magape itapanai, amambai

---

\* **4:16** Mt 26:31   \* **4:18** Mt 19:23-24

mataga maofana basef Godi. Ea' ina sahapifif sanda' waf bu'wafi banages, owa'atin. A sowa si'i gwa'aisi owa' sogalo andeande'ia. <sup>20</sup> Apa' anemb begawa itap fasipai si'i epes isimba same' basef bu'wafi sofa'ef sahapolif sanda' waf fasifi. Anis si'i begela 30-pelaisi, apa' anis si'i begela 60-pelaisi, apa' anis si'i begela 100-pelais hiasi.\*

*Anis sambaho' lambeh hogogala'i ha'oh baket lafelatama*

(Lu 8:16-18)

<sup>21</sup> Jisas na'ipas nanda' basef waminif atin na'i, "A'i epes sakata lambeh sopalo'ambeh ha'oh belitagw lafelagwa a'a sopalo'ambeh handambaho' baket? Owa'atin. Esis sawamonambeh belitagw ilif.\* <sup>22</sup> Hihaoom mape mandambahi'i, anaf motaga alihigima hiasi sotolom sogawam. Apa' hihaoom hiami ata' sambaho'wam maga'ihi, anaf motaga mondawalap, hiasi sogawam. <sup>23</sup> Ipa' ali-gah hagagalipai pagame' basefi, ipa' pendame'ef andeande'!\*\*

<sup>24</sup> Ea' na'ipam wapani na'i, "Basef ipa' pagame'afi, ifimba a' pendegawef andeande'. Basef mamahifa faloma waf maif ipa' panda'masaf anis daiasi, ikwaf afamba atef anaf God nogwamepaf ipa', ea' nowatanimipa anom wapani.\* <sup>25</sup> Epes ami sagahapila basef Godii, atiasi God nowatanimasef wapani. Apa' isimba owa'sogahapilifia, atiasi basef kwawia'wif ifimba esis sogahapilafi, God a' nondalombasef esis ea' sope dowaf."

---

\* **4:20** Mt 5:15   \* **4:21** Mt 10:26; Lu 12:2   \* **4:23** Mt 7:2   \* **4:24**  
Mt 13:12

*Basef waminif atina aman nogowaha olemb gwa'aimbi bagataga*

<sup>26</sup> Jisas na'ipas basef waminif atin na'i, “Epес sogawis nomona maol Godi nope Dembinai nugumafias, amamba si'i anif basef waminif atin dei' ae' iga'ipipafi. Anona aman nowaha olemb gwa'aimbi aof ananifi.\* <sup>27</sup> Ea' nafi'i nepe baop na'oh owambeh hiembibi, nepe nimaguf hiafi safe' apa' olemb ambamba nagawambi bataga balo lu'wimb ba'imama? Anen ina nogawa bagataga bataga ba'imama, owa'atin. <sup>28</sup> Itap atep panda'olemb ambamba bataga balo bela gwa'aisi sailamb. Doko' ata' soh atoh hali', a'i owa' main, afis sataga ea' gwa'aisi sandanda' lu'wis sail.\* <sup>29</sup> Ea' satagama a'i owa' lu'wis, afis andeande' asaof. Nemaf afamba sagala' gwa'aisiefi fataga, aman anamba nanda' maol naloma nagwatop.”

*Basef waminif atina nalelef mastetilif si'i nalelef waminipilif*

(Mt 13:31-32; Lu 13:18-19)

<sup>30</sup> Jisas na'ias wapani na'i, “Epес sogawis nomona maol Godi nope Dembinai nugumafias na'amba atin si'i main? Ae' indila'waifam i'i basef maif waminif atini? <sup>31</sup> Analef nalelef mastetilif sa'usa'ulifi si'i nalelef waminipilif. Ina lu'walef a'owa' si'i sa'utip gwa'aipi lawah hiagahi magawagah itapi, owa'. Afalemba sa'osa'olef a'owa!. Anen nagawaf itap. <sup>32</sup> Nawafa main, natagai ma nagalo lu'una a' nikila' lawah hiagahi hogotawa aofahi. Nataga lawag lu'unai, agof fandalona fafe'agon ganigani. Ea' amiguf

---

\* **4:26** Je 5:7   \* **4:28** Joe 3:13; Re 14:15

faf'i fala owah fandambaho'ma owaf fatoma agufugama."

*Jisas na'i basef hiafi waminif atin  
(Mt 13:34-35)*

<sup>33</sup> Jisas na'ipas basef waminif atin si'i nali' naga'ipasafi. Na'ipas nondola'waifa hiahawes hiasi fagi'ma gawa asasini nafe' negetambel. <sup>34</sup> Anen ina na'i anif basef alihifa esis, owa!. Anen na'if waminif atin. Apa' a'i owa', alipumi ananimi atom malomana mape, dao' na'ipamef alihif kofagefa waminif atini.

*Jisas ninifala embel maloma fufin fasopam be'  
mape*

*(Mt 8:23-27; Lu 8:22-25)*

<sup>35</sup> Nemaf afamba atef, wambomota felefele'ma owamb, Jisas na'ipa alipumi ananimi na'i, "Afa' a' ofe' dumb ambamba fisanganamb."

<sup>36</sup> Ea' amom makwaha esis amam nematawa hisasi mafe' bot atamba Jisas nagatumatai mofa'ata mafe'. Anis dais sofa' anogw botagw daiagw waloma bot atamba safe!. <sup>37</sup> Ea' anona fufin lu'unai naluwi, naoh manda'am lasiali' mafe' mawis bot nomon ea' ta'i si'itama embel. <sup>38</sup> Jisas na'oh nolola bot tagagi'ma nola pilo' na'oh.

Ea' amom mafe' minimbalona ma'ipana ma'i, "Tisa dembinai, afa' wa'i ahigililafa, ina' negawafa, a'a owa'?" <sup>39</sup> Ea' Jisas nosafel ninifala fufin na'ipa embel naoh na'i, "Ipa' ea'. Fufin neloma embel ipa' be' pepe."

Ea' fufin nowala, embel ina ata' lasiali' a' owa'atin betah hilili'.

**40** Ea' na'ipa alipumi ananimi na'i, "Ipa' ombel mahepama main? Ipa' pihapifa basef Godi pa'i ae' banagiwai, a'a owa'?"

**41** Ea' amom mati na'amba, ombel maham kwapete' endilisi ea' manda'ipama ma'l'i, "Anen epen ami? Na'ipa fufini embel same'ana sagahapifana?"

## 5

*Jisas natofa ambagof hiami awami magape anona amani*

(Mt 8:28-34; Lu 8:26-39)

**1** Jisas nao'wa alipumi nafe' nataga anagon wa'ol dumb ambamba itap esis Gerasai sagapoma.\* **2-3** Anen nakwaha bot nisila'i, kwafalis atin anona aman ambagof awami magapaunai nafi'mai anen. Aman anamba nape na'oh dondol wandelef sagawa epes sagaga'ima nafi'i. Ea' sen wapani ina sisihina, owa'. **4** Esis sali' sombalo'ana sumafiana dondol, sanda' seni hankap banagami sowa'ana lagof bo'wagahana lifilafi. Owa' owa'atin. Anen nahape'am atin. Owa' anin epen banagena nembalo'ana sisihina nogapea, owa'atin. **5** Dondol owamb alip nape nafe' wandelef halafutagw, nagafe' nanda'am wiwa nafe'. Nasa'ma otamba hikalimi natotopa' alop ananipi. **6** Anen ata' nati Jisas nafi'i laogon, nasagih nafi'i nindiwia nembawa notaomana.\*

**7-8** Ea' Jisas nogawa aman anamba ambagof awami magapaunai. Ea' na'ipam na'i "Ipa' ambagof aupai, ipa' kwahowa aman anamba."

---

\* 5:1 Mk 1:23 \* 5:6 Mk 1:24

Ea' anen hoga'ala mehip na'i "Jisas, ina' Nogamana dembinai God nagape ilif endilisii, ina' na'i nenda' maina ae'? Ae' a'ipina endilisi gani ilifa agol Godi, ina' owa'i nese'e akafimia."

<sup>9</sup> Owa' Jisas nahali'ana na'i, "Agol ine'igili ami?"

Anen na'i, "Apa' ambagof aupai hiapai. Dei' agol ape'igili mini'ap laupi."

<sup>10</sup> Ea' nahali' Jisas dindinip na'i, "Ina' netofafa ofa' ofe' anep itap lauguni, owa'i."

<sup>11</sup> Anagof bogof hiagufi falutu fa' gwa'aisi anota damota felefele'. <sup>12</sup> Ea' ambagof amamba mofala Jisas ma'ipana dindinip ma'i, "Ina' netofafa ofe' uwis ope oloma bogof gwagwafumba."

<sup>13</sup> Ea' Jisas na'i aho'mam, makwaha aman anamba mawisi a' mafe' mawisa bogof. Ea' bogof agwafomba hiagufi 2000-pelaiguf fafa' fafe' mehip kwapete'agof filiana anagon awagoma tata. Ea' bogof agwafomba hiagufi fafa' fafe' mehip fowala ta'alogol awagoma tata fola embel dumb afum hi'alam. <sup>14</sup> Ea' amom mugumafi-agufi mafa' mafe' ma'ipasa basef ifimba wambel lu'wagoma amam nematawa hiasi. Ea' ma'ipas anagon daiagon wapani ma hiahaom amamba amom magatului. <sup>15</sup> Ea' safi'mai Jisas sati aman anamba fowa' ambagof awami magapau-nai, dei' ambo'ona nomonas fasisi sapaona andeande' nowaho' lowaf nape. Amam nematawa hiasi satalona ombel mahas. <sup>16</sup> Ea' esis sagati hiahaom amambai, sa'ipa esis wambelisi ma hiahaom magataga aman anamba ambagof awami magapaunai. Ea' sa'ipas hiahaom magatagama

bogufi wapani. <sup>17</sup> Ea' esis hiasi sa'ipa Jisas dindinip sa'i nokwaha itap apamba asasima nofo'o anagon. <sup>18</sup> Ea' Jisas nalota bot owa', aman anamba fowa' ambagof awami magapaunai nahali' Jisas dindinip na'i, "Ae' a'i efe' elomena."

<sup>19</sup> Apa' Jisas ina na'i aho'mana, owa'. Ea' na'ipana na'i, "Ina' nefe'ma esis wambota atota ine'isi ni'ipasa amamba dembinai nanda'menam ine'i nati uwahipina ma nanda'ena bo'wena."\*

<sup>20</sup> Ea' aman anamba nafe' nawalapa basef ifimba na'ipasef walemb ilifunamailimb Dekapolisa hiahaom Jisas nanda'manami. Ea' esis amam nematawa gogolalasis kwapete ukup malamafe'.

*Jisas nasa'ma nogamana Jairusi kosafel kwape wapani ea' nanda' ano'w nemata'w kwagahapila lowafananifi ambo'okw*

(Mt 9:18-26; Lu 8:40-56)

<sup>21</sup> Jisas nofa' bot notanima nambo dumb ambamba nafe' fisana gani wa'ol, ea' amam nematawa hiasi safi'i sape salagamana felefele'ma dumb akata <sup>22</sup> ea' anona aman Jairus nugumafi ipat Juda sandakolasatai nafi'i. Anen nati Jisas, nindiwa nembawa notawa felefele'ma bo'wagah Jisasi.\* <sup>23</sup> Ea' na'ipana dindinip na'i, "Sa'ukwi nogame ae'akwi afagof 12-pelaiguf fagalo'akwi felefele' kwa'i akoga'. Ae' a'i ina' nefe' newamona lagol ine'igili ako'wa ambal lopao'w kogape namo'w."

<sup>24</sup> Jisas nalomana mafe', hiasi amam nematawa safe' sagi'mam sandalili'amona atin salutu dogw.

---

\* **5:19** Mt 4:25; Mk 7:31    \* **5:22** Mt 8:3; Mk 7:32

**25** Ea' ano'w nemata'w kwape kwalomas, aowas aowasini nanda'a'w kwape gamba atapi'w afagof 12-pelaiguf. **26** Ako'w kwafe'ma dokta hiasi saso'akwa akafimi, ea' kwalamona moni ako'wini hi'alana kwagatala dokta isimba hiasi ma sonda'akw bo'okw, owa' owa'atin. Aowas inimba nataga lu'win atapin napao'w. **27** Ea' kwame' basefa Jisas nafela anis aowas nanda'asi ambo'wes. Ea' kwaloma amam nematawa hiasi kwafi'i alafuga Jisasi kwahapila lowaf ananifi.\* **28** Ako'w okom mandanda' ma'i, "Ae' egasa lagola lowaf ananifi, atiasi ambo'owe."

**29** Ea' kwafalis atin esimbel pele'atam ea' kwame' alop akwa'upi pataga bo'op, aowas dei' a' nafe' ea'!.\* **30** Ea' Jisas name' alop ananipi powafa, name' anom banagami ananimi makwahona mafe'ma manda' anin epen bo'wen. Na'amba nandambema la'afena esis hiasi na'i, "Ami nasa lagola lowaf ae'afi?"

**31** Ea' alipumi ananimi ma'ipana ma'i, "Ina' natilis a'a owa' amam nematawa isimba hiasi salutu sandalili'amona atin sagalomafa? Dei' maina ina' ata' naga'i, 'Ami nasa lagola ae'!?"

**32** Ea' Jisas nandambema natologon na'i niti inimba nagahapilanai. **33** Ea' nemata'w akwamba kogawa hiahawes isimba sagatagama'wi, ombal maha'w ambombol atin. Ea' kwafi'i kwindiwa nembawa kotawa felefele'ma anen, kwawalapa hiahaom kwa'iam alihim.\*

**34** Ea' Jisas na'ipa'w na'i, "Nemata'w, ina' ea' nahapifa ae' banagiwai. Isimba atis dei' anda'ena

---

\* **5:27** Mt 14:36    \* **5:29** Lu 6:19    \* **5:33** Mk 10:52; Lu 7:50, 17:19

bo'wena. Ina' fo'o, opaf ine'ifi fope awanef. Esimbel ine'imi a' fataom, dei' aowas ine'ini ahi'alan."

<sup>35</sup> Jisas ata' na'ipa'w atin, nati anom amam makwaha ipat Jairusi a' mafi'i ma'ipa Jairus ma'i, "Nogamena ine'ikwi akwaga' ea'. Isimba atis dei' ina nenda' Dembinai Tisa nofo'o noma'w kohana, owa', hapaimi."

<sup>36</sup> Owa' Jisas ina nowa' aligah name'ama basef ifimba amamifi, owa'. Ea' na'ipa Jairus na'i, "Ina' ombel mogahena owa'i. Hapifa ae' banagiwai."

<sup>37</sup> Ea' anen ina na'i aho'ma amam nematawa hisasi sogalomana, sogawis ipat atamba, owa'. Anen nao'wa Pitai Jems maloma Jon amom atom mawis malomana. <sup>38</sup> Mafe' mataga ipat Jairusi, Jisas nati esis salef mehip sawa salopa'w kwapete'as.

<sup>39</sup> Ea' nawis na'ipas nomon na'i, "Dei' maina ipa' palef panda' kwala'ap lu'unai? Awani inimba ina naga' dogw, owa'. Anin na'oh atin."\*

<sup>40</sup> Ea' esis sanda' iafana kwapete'as ama naga'ias na'amba. Ea' nagalo'ma esis sawisi ando'. Anen nao'wa ahama'wi ma'makw saloma alipumi ananimi wanom, esis atis safe' sawis nomon awani inimba naga' naga'oma.\* <sup>41</sup> Ea' nahapila lagol akwa'ugili na'ipa'w na'i, "Talita kumi." Apa' mambema basef ifimba ma'i, "Nemata'w sa'ukwi, ae' a'ipina, ina' dei' safel."

<sup>42</sup> Ea' kwafalis atin nemata'w akwamba afagof 12-pelaiguf fagalo'akwi kosafel kwafe' esis satolo'w, sosafel gogolasis kwapete!.\*

---

\* **5:39** Jo 11:11   \* **5:40** Lu 7:14   \* **5:42** Mk 1:44, 7:36

**43** Ea' Jisas na'ipas dindinipa sigaila basef ananifi na'i, "Ipa' ina pi'ipa anin epena hiahawes isimba, owa'i."

Ea' na'ipa esisa sogaso'akw anis gwa'aisi kogwa'as.

## 6

### *Esis Nasaretisi sowa' alafugaha Jisas (Mt 13:53-58; Lu 4:16-30)*

**1** Jisas nosafel nakwaha wambel ambalemba nafe' wambel ananimbili kofagama Nasaret naloma alipumi ananimi.\* **2** A'i owa' nemaf sagapoma noma'wafi sa'i sabat, nafe' nawis ipat Juda sandakolasatai naso'asa basef Godi amam nematawa, same'anamef sosafel gogolalasis sa'i, "Aman anamba nofa' basef ifimba ani? Gawa inimba nagape anini gawa mamahina? Ami natopalopana ma dei' nanda' banagami amamba si'i God nanda'ami?\* **3** Apa' magawa aman anamba fowa' nanda' kamda nagala' ifagwi. Anen Maria nogama'w, nagape wambel atimbili. Anen sahoma Jemsi Joses, a Judasi Saimon. Hanitiamana ananiwai wape walomapa na'a."

Esis sa'ias na'amba opalef a' awelefa anen, sowa' alafugahana.\*

**4** Ea' Jisas na'ipas na'i, "Anona profet agol gatomananalemb walemb dialemb, sa'i anen dembinai sahapifana. Apa' ina anagol agol gatoma gandawalapana alihigila wambel ananimbili kofagama, wambota ananisi owa!.

---

\* **6:1** Jo 7:15   \* **6:2** Jo 6:42   \* **6:3** Jo 4:44

**5** Na'amba anen ina nanda' anom banagami si'i God nanda'ami wambel ambalemba, owa'atin. Anen NASA lagofa anis aowas nanda'asi atona atin nanda'as bo'wes. Ina nanda' hiasi na'amba atin, owa'. Nanda' isimba atis kwaia'wis. **6** Amam nematawa Nasaretisi owa' sohapifa Goda. Na'amba anen nomonas salasafe'mas.

*Jisas naso'ama maol alipumi 12-pelaim ananimi  
(Mt 10:5-15; Lu 9:1-6)*

Jisas nakwaha wambel ananimbili Nasaret nafe' na'ipasa basef Godi amam nematawa walemb hiagoma.\* **7** Ea' nofala alipumi ananimi 12-pelaim mafi'mai anen a' naso'ama banagami ananimi ma mogatofa ambagof awami, ea' nasapa'am mafe' biam atom.\* **8-9** Na'ipam na'i, "Ipa' ina pefa' gwa'aisi isalef moni solomepa, owa'i. Ipa' pela su pihapila galahitagw atogw pefe'. Apa' ina pefa' siogw biagw atogw, owa'i. Pefa' atona atin gondondaepa."

**10** Ea' na'ipam wapani na'i, "Ipa' pefe' pegataga anambel wambela, i'i anis si'i aho'ma pefe' pigawis ipat asasitai, ipa' pendape ipat atamba atota. Ama main pekwahota pesafel pefe'." **11** I'i analemb walemb owa' sofa'epa pefe' ifagw asasigwi seme' basef ipe'ifia, ipa' penda'as na'amba. Pekwaha wambel ambalemba pindila'ma usas itap pagail bo'wagah ipe'igahi ma sitilipa sogogawa waf awafi kofagema ea' asasimi atom."

---

\* **6:6** Lu 10:1   \* **6:7** Lu 10:4-11   \* **6:10** Ap 13:51

**12** Ea' nasapa'am mafe' biam atom makwaha basef ma'i, "Ipa' pewa' alafugaha waf awafi, pem-bema nelelemb pendafe'ma God."\*

**13** Ea' mafe' matofa ambagof awami magape esisi. Ea' mofa' wel fasili makolo'wala esis aowas nanda'asi hiasi sataga bo'wes.

*Aman anamba Jon nagapisi'as embeli fowa'  
Herot nahana nagaga'i*

(Mt 14:1-12; Lu 3:19-20, 9:7-9)

**14** Dei' anona gavman king dembinai Herot name' basefa maol inimba Jisas nali' nanda'ani. Ea' agol Jisasi gataga lu'wagol gafe'agon hi'alagon. Ea' anis amam nematawa sa'i, "Jon nagapisi'as embeli dei' nosafel wapani nape banagona nanda' maol si'i God nanda'ani."

**15** Owa' anis daias sa'i, "Anen profet Elija fowa'inai."

Apa' anis sa'i, "Anen anona profet si'i profet amamba fowa'imi."

**16** Gavman anamba king Herot name' na'amba ea' na'i, "Jon fowa' ae' atopa' bamafugana, apa' owa' a' notanima nosafel wapani nanda' maol Jisasi."

**17-18** Fowa' Herot naso' nemata'w owamana Filipi agili'wa Herodias. Ea' sahomana Herot no-laepana'w naso'akw. Ea' Jon nati waf afamba na'ipana na'i, "Ina' naso' nemata'w sahomenai, ea' nawala mu'uli Godi. Na'ambai ina andeande, owa'."

Ea' Herot nasapa' anom amam mafe' mombalo' Jon mofa'ana mafe' nanda' kalabus. **19-20** Ea' Herodias kwame' basef ifimba, okom aom endilisi

---

\* **6:12** Je 5:14

ma Jon, kwa'i kohana afuna, apa' owa', owa'atin. Herot anen ombal mahanama Jon ea' numafiana andeande'. Isimba atis ako'w ina banage'wa kohana nogaga', owa'. Herot nogawa Jon aman bu'unai Godi. Afamba anen nagame' basef Jon naga'ipanaefi, anen nomonas hiahawes, ea' ombal mahana. Anen okom ma'ima'i a'owa' ma nogame' basef ananifi.

**21** A'i owa' main, Herodias kolaoma ano'w ufia'w ma kohana nogaga'. Ea' basef fagape na'amba. Herot nanda' anis gwa'aisi lu'wasi ma okom mogapoma nemaf afamba ma'mana kogolanafi. Anen nanda' gwa'aisi isimba ma anom dembami magatopalopana ma maol gavmani a anom dembami daiam mugumafi amom soldiai maloma anom dembami magape walemb anamba hiagoma Galilii. **22** Ea' amom dembami maloma Herot mape ma' gwa'aisi, owa' ano'w nemata'w sa'ukwi aiawai'wi kwawisi kwalemb nomon. Ako'w Herodias nogama'w. Ea' Herot naloma amom dembami nomonas sa'i sa'i ako'w a'owa'. Ea' na'ipa'w na'i, "Ina' na'i ae' ese'ena hiahawes mais? Ina' ni'pias ae' ma egase'enas."

**23** Herot na'ias endilisi gani ilif na'i, "I'i ina' nihali' ae' ma egase'ena anin maemae ine'ma, ae' egasi'inai. Apa' ina' ni'i ae' egawala hiahaom ae'ami hiami maga'oh anamba agala'ambemagoma egase'ena du'wanima, ae' a'i aho'. Ina' du'wanim, ae' du'wanim, donda'am atin."

**24** Ea' ako'w kwawisi ando' kwafe' kwahali' ma'makw akwa'u'wi kwa'i, "Ae' atiasi i'ipa Herot efa' hiahawes mais?"

Ea' ma'makw kwa'ipa'w kwa'i, "Ina' ni'ipana ni'i nef'a'ai balaga Jon nagapisi'as embeli."

<sup>25</sup> Ea' kwandambemef kwawis nomon kwafalisa Herot kwa'i, "Dei' atef ae' a'i ina' neha Jon nagapisi'as embeli noga' netopa' balaga gola anota plet nef'a'agai nese'e."

<sup>26</sup> Ako'w kwa'ias na'amba, opaf Heroti a' ni-manif a'owa'. Apa' anen okom mandanda' ma na'i basef endilisifi atif naga'if banagafi ea' amam nematawa isimba sape salomana saga' gwa'aisii same'ana. Ea' ina ata' nosambala basef akwa'ufi, owa!. <sup>27</sup> Kwafalis Herot nasapa' anona soldia nafe'ma noha Jon nofa' balaga nogafi'i. Soldia anamba nafe' ipat sanda' kalabusa natopa' bamato'w Joni nofa' balaga <sup>28</sup> nalaga gala anota plet nofa'aga nafi'i naso' Herodias nogama'w kofa'aga kwafe' kwaso' ma'ma'w. <sup>29</sup> Ea' alipumi Joni magaila basef ananifii mame' basef ifimba ma anen, mafi'i mofa' si'ina mafe' mawana matmat. Ea' ma'uf.\*

*Jisas naso'as gwa'aisi epes hiasi 5,000-pelais  
(Mt 14:13-21; Lu 9:10-17; Jo 6:1-13)*

<sup>30</sup> Amom aposel Jisasi dei' motanima mafi'i mandakolas malomana. Ea' mape manifa maol mafe' manda'ani ma'ipana basef hiafi amom maga'ipasafi hi'alef.\* <sup>31</sup> Ea' anis amam nematawa hiasi fi'i fe' sail sanda' Jisas naloma alipumi ananimi ina ata' anota nogota ma amom mog'a' gwa'aisi, owa'!

Ea' Jisas na'ipam na'i, "Wale, afa' atofa ofe' anagon wafigima ma ata' tol opoma noma'w."

---

\* **6:29** Lu 10:17   \* **6:30** Mk 3:20

**32** Ea' mofa' bot mafe' anamba wafigima epes akagoma, amom atom mafe'. **33** Owa' owa'atin. Esis amam nematawa hiasi sogawa amom magafe'ma. Ea' esis hiasi sakwaha walemb hiagoma lu'wagoma kolo'walas sasagih safe' anamba ea' sali' sataga anamba amom ma'i mogafe'ma.\* **34** Jisas nefe'ma nisila'akata, nati esis hiasi. Natilis nati ina anona aman nepe numafias, owa'atin. Esis sape si'i sipsip owa' anin epen nigimafapia, ea' nati esis uwahipis nawalipasa basef bu'wafi hiafi.\* **35** Ama awin a'i newala naso', alipumi ananimi mafi'mai anen ma'ipana ma'i, "Ana'e wafigima epes akagoma, awin na'i a' newala. **36** Sapa'as sofo'o walemb aofah asasisi daindai sagape felefele'i ma sogatala gwa'aisi mais soga'as."

**37** Owa' Jisas nagwamam na'ipam, na'i, "Ipa' atipa pese'as gwa'aisi."

Ea' ma'ipana ma'i, "Ina' na'i afa' ofe' utalai bret 200 kina oso'osas? 200 kina otamba hiambai."

**38** Ea' Jisas nahali'am na'i, "Ipa' bret ma'uفتا ta'oh? Ata' fo'o petolota."

Ea' mafe' matolota ma'i, "Bret wa'agolita taloma agof biagof sa'oh."

**39** Ea' na'ipam na'i, "Ipa' pi'ipa esis amam nematawa sope sofe' oto otowa otalef fasilifi."

**40** Ea' sape safe' si'i amom maga'ipas, anis sataga 100-pelais, anis 50-pelais, na'amba atin.\* **41** Ea' Jisas nasa'ma bret atamba wa'agolita taloma agof biagof naniga nati heven nanifela God. Ama ea', nindiwata naso' alipumi ananimi mafe' maso' esis

---

\* **6:33** Mt 9:36 \* **6:34** Mk 8:1-9 \* **6:40** Mk 7:34

hiasi amam nematawa hi'agalas. Ea' nasa'ma agof wapani nawalogof naso'am maso'asagof. <sup>42</sup> Esis sa'as alihis andondo', <sup>43</sup> alipumi ananimi matatama du'wa'wanisi saga'ihi, malo'was folalef lu'walifi 12-pelailif si'ilif kwaef. <sup>44</sup> Esis amam nematawa saga' gwa'aisi isimbai hiasi, siamba amam atom mataga 5,000-pelaim. Apa' esis ina siamba awasi nematawa wapani, owa'!

*Jisas natoma nafe' embel ilif*  
(Mt 14:22-33; Jo 6:15-21)

<sup>45</sup> Jisas nasapa' alipumi ananimi mofa' bot malii' mafe' dumb ambamba mambo fisanamb Betsaida. Ea' nasapa' amam nematawa hiasi safe!.\* <sup>46</sup> Nasapa'as sagafi'i, anen nandowasa' halafuta nepe na'i nonda' beten. <sup>47</sup> Wambomota alipumi ananimi mape bot ata' atapim mala dumb lu'wambi la'afimba. Apa' Jisas atona nalutu akata. <sup>48</sup> Ea' nati fufin lu'wani nalo nafi'i anamba amom ma'i mogafe'ma, ea' nakoto'ma amom manda' pul masasapa' bot a' numa'una endilisi. Akot ata' tail atin felefele'ma logola owa', Jisas nagi'mam natoma nafi'i embel ilifa nafe'ma amom. Ea' na'i nikila'am nefe!.\* <sup>49</sup> Owa' mati anen natoma nafi'i embel ilif. Ma'i owa' anona gamba, ea' manda'as wiwa ma'oh kwapete'am. <sup>50</sup> Amom matolona gogolalasom. Owa' Jisas nalomam na'i kwafalis na'i, "Ipa' banagepa, ombel mogaheda owa'. Ae' atowe ma'uwi ailipa afi'i."\*

<sup>51</sup> Ea' nalota bot nepe nalomam, dei' fufin a' newala opalef amamilifi gogolalasom kwapete'am endilisi, ea' nomonas salasafe'

---

\* **6:45** Lu 5:16, 6:12; Lu 9:28   \* **6:48** Lu 24:37   \* **6:50** Mk 4:39

hiahias.\* <sup>52</sup> Amom ina ata' nomonas sape andeande'ma bret atamba Jisas naso'asata esis hiasi saga'atai, owa'. Na'amba amom ma'i anen ina banagonai. Ukup amamipi paso'am.

*Jisas nanda' aowas nanda'asi hiasi ambo'wes hi' alas anep itap lu'upa Genesaret  
(Mt 14:34-36)*

<sup>53</sup> Jisas naloma alipumi ananimi mowala mambo dumb ambamba mafe' mataga anep itap lu'upa Genesaret. Ea' mowa' bot tail, <sup>54</sup> misila' mafe' owa', esis kwafalis sati Jisas asagawana. <sup>55</sup> Ea' sasagih safe' anamba hiagoma ganigani. Esis same' basefa Jisas nagapoma, ea' sala aowas nanda'asi belitagw sofa'as safi'mai anen.\* <sup>56</sup> Walemb hiagoma lu'wagon sa'ogon, naloma anamba hiagoma Jisas nagafe'ma, esis sambe' isimba aowas nanda'asi sa'oh baop la'afen. Ea' sofala Jisas banagembela niga'i aho'ma isimba sogahapila lowaf ananifi da'malififa atef. Ea' esis mamahisa sagahahapilafi sataga bo'wes wapani.

## 7

*Basefa mu'uli Godi fikila' basef bafasas ihasas sagawalipasafi  
(Mt 15:1-9)*

<sup>1</sup> Amam dembami Farisi maloma anom dembami daiam magawalipasa mu'uli Godi amom mapani Jerusalem mafi'i mandakolas maloma Jisas.\* <sup>2</sup> Ea' mati anom alipumi Jisasi ma' gwa'aisi owa' mosa'opa lagof bo'wagof mea'as si'i amom

---

\* **6:51** Mk 8:17 \* **6:55** Mt 14:36 \* **7:1** Lu 11:38

Farisi maga'ias, owa!. Ea' amom Farisi ma'i amom alipumi Jisasi lagof amamugufi aloguguf. <sup>3</sup> Dei' main, amom Farisi maloma esis hiasi Juda hi'alas, sagi'ma mu'uli inimba esis akupasi. I'i esis owa' sosa'opa lagof andeande'a, ina sea' gwa'aisi, owa!.\* <sup>4</sup> Esis sogafe' maketa sotanima sogafi'i, ma owa' sosa'opa lagofa, ina sea' gwa'aisi, owa!. Esis sagi'ma mu'uli hiani naninani sogofa'ana akupas assasisii. Sasa'opa kahi sospaes, a disi belegw atis, ama sagagi'ma mu'uli akupasi. <sup>5</sup> Na'amba amom Farisi maloma dembami magawalipasa mu'uli Godi mahali' Jisas ma'i, "Dei' si'i maina alipumi ine'imi owa' migi'ma mu'uli amom akupamia? Lagof amamugufi aloguguf ma' gwa'aisi."\*

<sup>6</sup> Ea' Jisas na'ipam na'i, "Fowa' profet Aisaia, nindila'waifa ipa' endilisi, ipa' paga'i basefa malogof biagufi. Anen nanda'ef andeande' dondo'ma ipa' na'ias na'amba na'i,

God na'i, 'Amam nematawa isimba sasa'ma agol ae'agili lu'wagola malogof asasigufi atogof, apa' opalef asasilifi fape laogona ae!. Ukup asasipi ina sahapifi, owa'atin. <sup>7</sup> Esis ina sawalipasa basef ae'afi, owa!. Sawalapa mu'uli epes sagape itapi atin, sambaso'mas sa'i, "Mu'uli inimba basef Godi." Ea' sanda'lotu sasa'ma agol ae'agili dowadowaf."

<sup>8</sup> Jisas na'ipam wapani na'i, "Ipa' apakwaha mu'uli Godi ea!, dei' pahapila waf epes sagape itapi atef tetele'if."

<sup>9</sup> Ea' na'ipam na'i, "Ipa' pegegawa andeande'i pa'i penda' waf fasifi atifi, owa' dei' apesam-

---

\* <sup>7:3</sup> Mt 23:25    \* <sup>7:5</sup> Ais 29:13

bala mu'uli Godi ma pagagi'ma waf ipe'ifi atef.\*  
**10** Fowa' gani Moses nagawalipasa mu'uli inimba na'ipas naga'i, 'Ipa' pinifela mamasepa ipe'isi pihipifas petopalopas.' Anif wapani na'if na'i, 'Epen ami niga'i basef awafima ahaman ma'man ananisii, inimba anis dais sohan nega'.'

**11** Owa' ipa' pambaso'am pa'i anif daif na'amba pa'i, Epen mamahina nindaiwa'ma negatopalopa mamasan ni'ipas niga'i, 'Otamba mais ae'asi andaiwa'ma egase'epas, ae' a' andandepasa egaso'anas God.' **12** Apa' ipa' Farisi paloma ipa' anipa pagawalipasa mu'uli Godi, ipa' pa'i aho'ma epen inimba negambaso'ma mamasan, ea' owa' netopalopasa. **13** Ipa' paila mu'uli fowa' gani pegefa'ana akupipa ipe'imii, panda' waf afambai pesambala basef ifimba Godi na'i mogatopalopa mamasapa. Ea' panda' waf ipe'ifi atef lu'ufi panda' waf awafi lifilafi na'amba ina andeande', owa!."

*Hiahaom awami magape opalefapa' epesi mawi-  
si ando' manda'apa awepa*

(Mt 15:10-20)

**14** Jisas nofalai amam nematawa hiasi wapani na'ipas anif basef waminif atin na'i, "Ipa' hipai peme' basef ae'afi okokomef pendegawef.\*

**15** Hiahawes gwa'aisi mais ando'asi ipa' pa'as sagawis nomoni, isimbai ina sanda'epa awepa, owa!. Apa' hiahaom magape ukup ipe'ipi nomoni mawisi ando', amambai atom manda'epa awepa.

**16** [Ipa' aligah hagagalipai, a pendame' basef ifimba.]

---

\* **7:9** Eks 20:12; Eks 21:17; Diu 5:16    \* **7:14** Ap 10:14-15

Jisas naga'ipas na'amba, <sup>17</sup> ea' nakwaha amam nematawa isimba hiasi a' nafe' nawis ipat. Ea' alipumi ananimi atom mahali'ana ma basef ifimba kofagefa waminif atini doko' naga'ipasafi. <sup>18-19</sup> Ea' na'ipam na'i, "A'i ipa' owa' ata' pegawaea! Hiahawes gwa'aisi main sagape ando'i owa' anis ipa' paga'asia sonda'epa awepaia, owa'atin. Gwa'aisi isimba sa'as sogowala opalef nomoni a safe' sakas safe' sowala dowah. Ea' ukup ipe'ipi ina awep, owa'atin. Waf afambai maga' gwa'aisi hiasi ina awafi, owa'!"

Jisas na'ipasa basefa gwa'aisi sasisasi hiasi hi'alas bu'wasi atis muga'asi.

<sup>20</sup> Ea' na'ipam wapani na'i, "Hiahaom magape ipa' epesi nomoni, ukup nomonas awami maim mataga ando', amambai atom manda'epa awepa. <sup>21</sup> Hiahaom awami magape ukup nomoni magawisii amamba. Waf naninani aunai, nomonas awami, waf sanda' so'a waulafi, wal, soha anis sogaga'i, <sup>22</sup> sogahambombaga waf daso'amaifi, waf kowagalasafi, waf baso'amunai naninani aunai, du'waniga, simbisambal, findiwa, sagafela agof asasigufi atogoflu'wagof, waf gawa akanai. <sup>23</sup> Waf anamba naninani hianahaona aunai, anamba nepe nomon ukup ipe'ipi nawisi ando' nanda'epa awepa."

*Nemata'w Finisiai'wi kwahapifa Jisas  
(Mt 15:21-28)*

<sup>24</sup> Jisas nosafel nakwaha wambel ambalemba, nafe' Tair nafe' nawis anota ipat. Anen nandaiwa'ma anin epen negegawa anen nagape na'amba. Owa', owa'atin. Anen

ina nandambaho'. <sup>25</sup> Ea' ano'w nemata'w kwame' basefa anen nape na'amba. Nemata'w akwamba nogama'w akwa'u'wi ambal aunai napao'w. Ea' ma'ma'w kwafalis kwafi'mai Jisas kwindiwa nembawa kotowa felefele'ma bo'wagah ananigahi. <sup>26</sup> Ako'w Finisiai'wi anep itap lu'upa Siria. Ako'w ina Judai'wi, owa'. Kwa'i diga Griki. Ea' kwahali' Jisas dindinipa nogatofama'wa ambal aunai nagape nogama'w akwa'u'wii.

<sup>27</sup> Ea' na'ipa'w anif basef waminif atin na'i, "Apa' ata' moso'asa gwa'aisi awasi ape'isi sili'. Apa' ina mofa' gwa'aisi awasi ape'isii mokwahis sofe'ma nombagw, owa'."

<sup>28</sup> Owa' ako'w akwagwamana basef anen kwa'i, "Dembinai, ina' na'i endilisi. Nombagw agogw gwafe' lafela tebol gwatatama gwa'aisi awasii sogowa itapi gwa'as."

<sup>29</sup> Ea' Jisas na'ipa'w na'i, "Ina' na'ias na'amba andeande!. Ea' tanima fo'o. Ambal aunai nakwaha nogamena ine'ikwi a' nawisi nafe' ea'."

<sup>30</sup> Ea' ako'w kotanima kwafe' ipat akwa'utai, kwati nogama'w akwo'ukwi tol kwa'oh alahis, ambal aunai nakwaho'w a' nawisi nafe' ea' ambo'okw kwa'oh andeande".\*

*Anona aman aligah haloma malogol sagaso'anai, Jisas nanda'ana bo'ona*

<sup>31</sup> Dei' Jisas nosafel nakwaha anambel wambel Tair, a' nafe' nawis la'afena wambel Saidon. Ea' nakwaha Saidon nafe' atin ganimba walemb ili-funamailimb Dekapolis, nataga dumb lu'wambi Galili. <sup>32</sup> Ea' esis sao'wai anona aman nafi'mai

---

\* **7:30** Mt 15:29-31

Jisas, aligah haso'ana haloma afega ananigai dindigiga. Ea' ina na'i andeande', owa'. Na'amba esis sofala Jisas ma nosa lagofa anen nonda'ana bo'ona.\* <sup>33</sup> Ea' Jisas nao'wana amom biam mafe' makwaha esis amom atom mape. Ea' nasapa' faguf bif ananifi fawis aligah aman anambai, wa'owa'ol. Ea' nisi'waf nasafaf afega aman anambai,\* <sup>34</sup> Jisas nosaniga nati heven, nahi okom nowafam mehip, na'ias na'amba na'i, "Efata." Basef kofagefa ifimba fa'i, "Ina' aligah hogal neme' ni'i andeande'."

<sup>35</sup> Ea' aligah a hagal, hiahaom manda' afega dindiginai ahigilalam kwafalis. Dei' a' na'i andeande'.\* <sup>36</sup> Ea' Jisas na'ipas nombomba'asa esis ina si'ipasa hiahawes isimba ma anin epen. Nape na'ipas dindinip timbi tambel. Owa', owa'atin. Èsis sawalapam sa'ipasam timbi tambel seme'am.\*

<sup>37</sup> Ea' esis bolalas endilisi sa'i, "Hiahaom hiami anen nanda'ami nanda'am bo'om atin. Anen nanda' esis aligah hagaso'asi same' andeande', esis malagof fagaso'asii a soga sa'i andeande'.

## 8

*Jisas naso'asa gwa'aisi epes 4,000-pelais  
(Mt 15:32-39)*

<sup>1</sup> Afamba amam nematawa hiasi sandakolas wapani sa'i seme' basef Jisasi. Ea' esis gwa'aisi akas. Na'amba Jisasnofala alipumi ananimi

---

\* <sup>7:32</sup> Mk 5:23; Lu 4:40, 13:13   \* <sup>7:33</sup> Mk 6:41; Jo 11:41   \* <sup>7:35</sup>  
Mk 1:43-45   \* <sup>7:36</sup> Ais 35:5

mafi'i na'ipam na'i,\* <sup>2-3</sup> “Ae' ati esis amam nematawa isimba uwahipis. Esis a sape salome nimaguf wanif gwa'aisi akas nolom mahas a'owa'. I'i ae' esapa'as sogafe' dowaf uta baop asasima, sitilif atona sowa so'oh sofe' iaiaf. Anis safi'i laogoma.”

<sup>4</sup> Ea' alipumi ananimi magwamana basef ma'i, “Ana'e wafigima epes akagoma. Atiasi afa' ofa'ai bret anima oso' amam nematawa isimba sea'as? Afa' bret ina hiata, owa'.”

<sup>5</sup> Ea' Jisas nahali'am na'i, “Dei' ipa' bret ma'uta ta'oh?”

Amom ma'i, “7-pelaita.”

<sup>6</sup> Ea' na'ipa esis amam nematawa sape itap, anen nafela bret atamba 7-pelaita, nanifela God nawalota naso' alipumi ananimi ma maso'asata esis amam nematawa hiasi. Amom maso'as dondo' hi' alas. <sup>7</sup> Ea' amom anagof agof sa'ugufi biagof wapani fa'oh. Ea' anen nasa'magof nanifela God, naso' amoma mogaso'asagof wapani.

<sup>8</sup> Ea' esis sa'as, dondo' alihis. Ea' alipumi ananimi matatamai du'wa'wanisi sagasaga'ih makolasis malo'was folalef lu'walifi 7-pelailif asi'ilif kwaef.

<sup>9</sup> Amam nematawa saga gwa'aisi isimbai sataga hiasi, 4,000-pelais. Ea' Jisas nasapa'as safe!. <sup>10</sup> Ea' kwafalis atin anen nalota bot naloma alipumi ananimi, mafe' anep itap lu'upa Dalmanuta.\*

*Amom Farisi ma'i miti hiahaom banagami si'i  
God nanda'ami  
(Mt 16:1-4; Lu 12:54-56)*

\* **8:1** Mk 6:34-44   \* **8:10** Mt 12:38

**11** Ea' amom Farisi maf'i ma'i basef mandahi-hianamaef maloma Jisas. Amom ma'i mogwambana ma mugati anen banagona a'a owa'. Na'amba mofalana ma'i anen nonda' hiahaom banagami si'i God nanda'ami. Amom ma'i anen nihimba'mama anen nagape banagami Godi ma dei' nanda' hiahaom amamba.\* **12** Jisas name' ambal ananili nemanil ea' na'i, "Dei' maina ipa' amam nematawa dei' pagape itap apa'i pa'i pe-falagama pa'i pigati anin ametal banagani? Apa' ae' owa'atina enda'an pigatilina, owa'atin."

**13** Ea' nakwaha esis a' notanima nalota bot nafe' dumb ambamba fisanamb.

*Basef waminif atina yis Farisii saloma Heroti fa'i basefbaso'afi amamifi*  
(Mt 16:5-12)

**14** Amom alipumi Jisasi ukup paso'ama mogofa' bret hiata togalomam. Amom mofa' atotota tala bot\* **15** Ea' Jisas naumbalom na'ipam na'i, "Ipa' pindimafuma andeande', solawaipama yis amamba Farisii maloma yis Herotii."

**16** Ea' mame' anen na'ias na'amba, a manda'ipama ma'i, "Afa' ukup paso'afa bret ta'ihia dei' na'ipafa na'amba."\*

**17** Jisas nogawa basef amamifi, na'ipam na'i, "Dei' maina ipa' paga'i, 'Ipa' bret akepa?' A'i ipa' ukup pase'epa, owa' ata' pegawaea?\* **18** Ipa' naep papaipa, apa' ipa' owa' ata' piti anin maemaea. Ea' aligah hapaipa, apa' ipa' ina' peme' basef, owa'. Ukup a' pase'epa.\* **19** Afamba ae' agawala

---

\* **8:11** Lu 11:29 \* **8:14** Lu 12:1 \* **8:16** Mk 6:52 \* **8:17** Jer 5:21; Mk 4:12; Ap 28:26 \* **8:18** Mk 6:41-44

bret 5-pelaita ma epes isimba 5000-pelais, ama du'wa'wanita taga'ihi patatamata palo'wata folalef ma'ulif si'ilif?"

Ea' amom ma'i, "12-pelailif."\*

**20** "Apa' anef nemaf agawala bret 7-pelaita ma du'wa'wanita taga'ihi patatamata palo'wata folalef ma'ulif si'ilif?"

Ea' amom ma'i, "7-pelailif."

**21** Ea' anen na'ipam na'i, "Owa'atin. Ipa' ina dei' apegawa, ata' owa!."

*Jisas nanda' anona aman naep pagaso'anai Betsaida bo'ona nati*

**22** Amom mafe' mataga Betsaida, sao'wamanai anona aman naep pagaso'anai nafi'mai Jisas, sa'ipana dindinipa nogasa lagol ananigili nonda'ana bo'ona. **23** Ea' nahapila lagol anen naep pagaso'anai, nofa'ana nakwaha wambel nawis ando' nisi'wafa naep ananipi, nasa lagola anen nahali'ana na'i, "Ina' nati ambambasif a'a ata' owa!"

**24** Ea' aman anamba natologon, na'i, **25** "Ae' ati anis epes apa' agatilis si'i lawah hagafe!."

Ea' Jisas nasa lagol wapani, naep ananipi dei' a' natologon mehip naep ananipi apataga be'ep, andeande', nati hiahawes pelele!.\*

**26** Ea' Jisas nasapa'ana nafe' ipat ananitai na'ipana na'i, "Ina' owa'i nefe' niwis wambel ni'ipasa ae' anda'ena ambo'wenaia, owa'i. Ina' nefe' usi'ina ipat ine'itai."

---

\* **8:19** Mk 8:6-9    \* **8:25** Mk 7:36

*Pita na'i Jisas anen aman anamba God nandandepana nasapa'ana nagafi'ii esis saga'i Kraisi  
(Mt 16:13-20; Lu 9:18-21)*

<sup>27</sup> Jisas nosafel naloma alipumi ananimi mafe' felefele'ma anambel wambel Sisaria Filipai. Amom mafe'ma ufia'w, nahali'am na'i, "Esis amam nematawa sa'i ae' aman mamahowema?"\*

<sup>28</sup> Ea' amom ma'ipana ma'i, "Anis sa'i ina' Jon, aman nagapisi'as embeli. Ea' anis sa'i ina' Elaija. Apa' anis sa'i ina' anina profet, fowa'inai.\*

<sup>29</sup> Ea' nahali'am na'i, "Dei' ipa' pa'i ae' ami?"  
Ea' Pita nagwamana na'ipana na'i, "Ina' Krais, God nandandepena nasapa'ena nagafi'i."

<sup>30</sup> Ea' na'ipam dindinip na'i, "Ipa' ina a' pe-walapa ae' pi'ipa anis pi'i ae' Krais, owa'i."

*Jisas na'ipasa nogofa' akafimi ma noga' nogosafel wapani*

*(Mt 16:21-28; Lu 9:22-27)*

<sup>31</sup> Ea' Jisas nasefela basef ananifi nawalipam na'i, "Ae' ataga open egefa' alop epesi, atiasi agufumi Judai mose'e akafimi lu'wami. Amom moloma amom pris dembami moloma amom dembami magawalipasa mu'uli Godii. Atiasi mondaiwa'me mose'e alafugah mohe ega' ma nimaguf bif ea', fegafe'ma wanifi a' esafel wapani."

<sup>32</sup> Anen nawalapa basef ifimba alihifa amom. Ea' Pita nofa'ana nendelefata nasa gemba ea' nagagaolana ma basef ifimba naga'ipasafi.  
<sup>33</sup> Owa' Jisas nandambema natiti alipumi ananimi, nanda' megahaha Pita na'i, "Ina' si'i

---

\* **8:27** Mk 6:15   \* **8:28** Jo 6:68-69; Mk 9:9

Satan. Dei' main, ina' owa' okom mopoma okom Godia. Okom mandapoma nomonas epes sagape itapi atis. Delefata nefe' alafuga ae'agai."\*

**34** Ea' Jisas nofalai esis amam nematawa safi'mai anen saloma alipumi ananimi na'ipas na'i, "I'i anin epen ni'i nila ae', anin ata' netalogofa okom amambai ananimi atom, nefe' lafel ea' ina ombel mohana anis sohan negaga', owa'. Ae' efa' akafimi ma anda' maol Godi, atiasi sehe ega' lawag usi'igai ti'wanaegai. Epen inimba a' nenda'as na'amba atin si'i ae' ma nigagi'ma ae'. Apa' i'i owa', owa'atin. **35** Epen ami okom mopoma ambal ananili atol, ni'i nihapilatatala'il, anaf ambal ananili higililal. Apa' epen ami okom mopoma ae' eloma basef bu'wafi Godi ma nesambala ambal ananili itap apa'e, anaf God a' nofa' ambal ananili lotanimai nepe andeande' lifilafi. **36** I'i epen ami nenda' maol naninani negefa' gwa'aimi uga hiahaom hiami itapami atom higilgalami, anin wapani awen higililan nelomam. Dei' hiahaom amamba atiasi motopalopan mi'imama? Owa'atin endilisi. **37** Epen inimba atiasi nefo' hiahaom maima negatal ambal ananili ma nitanima negewambilali wapani? Owa'atin.\* **38** Ae' ataga epen egefa' alop epesi. Amam nematawa dei'isi sanda' waf aunai sakwaha sagahapifa Godi. Epes isimba mamahisa ambal aola ae' sondafa'me eloma basef ae'afi, anaf ae' wapani ambal aola epes isimba endafa'mas nemaf afamba ae' ifi'i egaloma hiahaom fasimi banagami mogogala'i

---

\* **8:33** Mt 10:38-39    \* **8:37** Mt 10:33

ahamai elomai amom ensel bu'wami Godi wapani.

## 9

<sup>1</sup> Jisas na'ipa esis na'i, “Ae' a'ipipa endilisi ipa', anipa pagalutu na'aii atiasi ina pega' ulal, ata' owa'. Anipa apiti banagami Godi moloma anen nogape dembinai kinga epes ananisi.”\*

*Alop Jisasi pataga pandati na'a, a pogala' a'owa'  
(Mt 17:1-13; Lu 9:28-36)*

<sup>2</sup> A'i owa' main, nimaguf wanif wanif fafe'ma hi'alef, Jisas nao'wa Pita naloma Jemsi Jon nao'wam mondowasa' anota halafuta lautai. Nao'wa amom atom tol mape, owa' mati alop ananipi apandati na'a pogala' a'owa'. <sup>3</sup> Luwaguf maim ananimi mataga mogala' afitim a'owa'. Ina anona aman itapanai la'ifina nanda' luwaguf maim mataga afitim na'amba, owa'atin. <sup>4</sup> Ea' mati amam biam fowa'imi, Elaija naloma Moses mataga malutu ma'i maloma Jisas. <sup>5-6</sup> Pita naloma Jemsi Jon ombel maham endilisi, ea' Pita na'i ni'i anif basef, owa', owa'atin, anen ina ata' okom mapoma basef na'i nigaliefi, a' owa'atin. Ea' na'ias na'amba na'i, “Dembinai, afa' wape na'a'e a'fafas, ata' ola' anoh aolah wanoh hondandamepa. Ina' anop, Moses anop, Elaija anop.”\*

<sup>7</sup> Owa' anom ilagw maofana amom. Ea' anagol malogol ga'i gatagai ilagw amamba ga'i basef ga'i, “Anen Nogame ae'anai, ae' okom mohafel maimailana a'owa'. Ipa' pendame' basef ananifi.”

---

\* 9:1 Mk 13:30    \* 9:5-6 Mt 3:17; 2 Pi 1:17-18; Diu 18:15; Ap 3:22

**8** Alipumi Jisasi wanom matologon kwafalis ganigani, apa' ina mati anin epen, owa'atin. Mati Jisas atona nalutu nalomam.\* **9** Ea' amom ata' makwaha halafuta mafi'i atin, Jisas na'ipam din-dinip na'i, "Ipa' ina pewalapa hiahaom amamba dei' pagatulumi pi'ipa anin epenam, owa'i. Apefe' dondo'ma nemaf afamba ae' ataga epen egefa' alop epesi, ma sehe ega' egesafel matmat wapani, dao' pi'ipas."

**10** Ea' amom mahapila basef ifimba mape, manda'ipama ma'i, "Basef ifimba Jisasi notanima nogosafel matmat, kofagefa fafe' fa'imama?"

**11** Ea' mahali' Jisasi ma'i, "Dei' maina amom dem-bami magawalipasa mu'uli Godi maga'i Elaija fowa'inai ata' nili' nogafi'i??"\*

**12** Jisas nagwamam basef na'i, "Aho' endilisi. Elaija nifi'i nondondomba hiahaom hiami hi'igalam wapani. Apa' basef fagape buk Baibeli fa'i dembinai anaf notaga epen nogofa' alop epesi nope ni'imama? Ifimba fa'i anen neme' akafimi lu'wami ma esis sogowa' alafugahanai.\* **13** Dei' a'ipipa, anona Elaija a' nafi'i ea', apa' esis sagi'ma nomonas asasimi atom, sanda'mana waf awafi endilisi si'i anif basef fagape buk Baibeli faga'ias."

*Jisas nanda' anona sa'unai ambal aunai naga-paunai ambo'ona*

*(Mt 17:14-21; Lu 9:37-43)*

**14** Jisas naloma alipumi wanom mafi'i mati anom alipumi du'wanim 9-pelaim magapanii, ea' mati amam nematawa hiasi salutu felefele'ma

\* **9:8** Mt 12:16; Mk 8:30    \* **9:11** Mal 4:5; Sam 22:1-18; Ais 53:3

\* **9:12** Mt 11:14

amom. Ea' mati anom dembami magawalipasa mu'uli Godi ma'i basef mandahihianamaef maloma alipumi Jisasi 9-pelaim. <sup>15</sup> Amam nematawa isimba hiasi sati Jisas nafi'i, sosafel gogolalasis kwapete'as, sasagih safe'ma anen sanifelona. <sup>16</sup> Ea' Jisas nahali' amom alipumi ananimi na'i, "Ipa' palomam pa'i main pandahihianaman?"

<sup>17</sup> Ea' anona aman nagape la'afena amam nematawai nagwamana basef Jisas na'i, "Dembinai tisa, awani aman ae'ani anona ambal aunai napain, malogol gaso'an. Na'amba efa'an afi'mai ina'. <sup>18</sup> Nimaguf ifimba hiafi ambal anamba aunai nahapilan sisihin nakwahin newa itap. Ea' ofap pataga malogolan, nalelef fendetapa' imun dogw, a alop ananipi dindigisip a'owa'. Ae' a'ipa alipumi ine'imi a'i motofa ambal anamba aunai nofa' nofo'o, apa' amom owa' banagema."

<sup>19</sup> Ea' Jisas name' basef ifimba, na'ipas na'i, "O, ipa' amam nematawa owa' pegahapifaea. Nimaguf ma'uf ae' ata' epe elomepa? Nimaguf ma'uf wapani ma egefa' nimanimi ipe'imi? Ipa' okwan nifi'mai ae!."

<sup>20</sup> Ea' esis sao'wamana awani inimba anen. Ambal anamba aunai nati Jisas, kwafalis atis nakoto' anin kwapete', nafe' newa itap hota atin na'oh, apah afitimi ofap mataga sisih malogol ananigili.

<sup>21</sup> Ea' Jisas nahali' ahama awani inimbai na'i, "Nogamena ine'ini, aowas inimba nanda'an nape nimaguf ma'uf?"

Anen na'ipana na'i, "Fowa' ata' awani nape atapina na'amba atin. <sup>22</sup> Dondol ambal aunai nakwahin newala nasef nif, a newala embel na'i

nohan afin. Apa' i'i ina' banagena ma, niti apa' owahipipa netopalopapa."\*

<sup>23</sup> Ea' Jisas na'ipana na'i, "Dei' maina ina' naga'hal'i na'amba? Epen ami nigahapifi endilisii, anin banagena maol fasini naninani."\*

<sup>24</sup> Ea' aman anamba na'ipa Jisas na'i, "Ae' ahapi-fina kwasakwasala. Dei' netopalope ma igahapi-fina banagewe endilisi."

<sup>25</sup> Ea' Jisas nati amam nematawa safi'i salutu salipana felefele', na'ipa ambal anamba aunai mehip na'i, "Ina' ambal awasinai nagasopama ali-gahi malogol awani inimba, ina' lofa'o nekwaha awani inimba, netanima nigafi'mani owa'i."\*

<sup>26</sup> Ea' ambal anamba aunai nakoto'an mehip hoga'ala kwapete' nakwahowan nandahi' nafe'. Ea' awani inimba a' nandati si'i sagaga'i ea' hiasi satilin sa'ias na'amba sa'i, "Anin a' naga' ea!."

<sup>27</sup> Na'amba Jisas nahapila lagol ananigili naso'man ea' bo'wen nalutu. <sup>28</sup> A'i owa' main, Jisas nafe' nawis anota ipat nape naloma alipumi ananimi mape. Ea' mahali'ana na'amba ma'i, "Dei' maina afa' owa' banagefama ogatofa ambal anamba aunaia?"

<sup>29</sup> Jisas na'ipam na'i, "Ipa' pendabeten pihali' God atin, ipa' a' banagepa ma pegatofa ambal anambai aunai. Owa' ano'w uchia'w daia'wa pe-gatofanaia. Beten atin."\*

*Jisas na'ipas a' bif a sohana nogaga' ma bola  
notanima nogosafel wapani  
(Mt 17:22-23; Lu 9:43-45)*

---

\* <sup>9:22</sup> Mt 21:21; Mk 11:23    \* <sup>9:23</sup> Lu 17:5    \* <sup>9:25</sup> Mk 1:26

\* <sup>9:29</sup> Jo 7:1; Mk 8:31; Mk 10:32-34

**30-31** Ea' Jisas nao'wa alipumi ananimi makwaha na'amba magapoma mafe' mataga itap apamba Galili mawis mafe' anagon mape. Dei' main, Jisas na'i nope nondambaho' nolomama nogawali-pama basef ananifi. Na'amba nandaiwa'ma anona aman nogogawa anamba amom mafe' magapoma. Anen naso'ama basef na'amba na'i, "Ae' ataga epen egefa' alop epesi, atiasi felefele' anona aman noso'asa ae' efe'ma lagof amom boumi ae'ami mehe egaga'. Ama nimaguf bif hi'ilif fe-gafe'ma wanifi, a' itanima esafel efa' ambal wapani."\*

**32** Ea' alipumi ananimi mame' basef ifimba atif, apa' amom ina mogawef, owa!. Na'amba amom ombel mahama mogahali'ana ma basef ifimba kofagefa.

*Epes ami sope dambesi?*  
(Mt 18:1-5; Lu 9:46-48)

**33-34** Ea' Jisas naloma alipumi ananimi mafe' mataga Kaperneam, mafe' mawis ipat nomon, Jisas nahali'am na'i, "Ipa' pa'i basef maif, doko' wagafi'i ufia'w?"

Doko' magafi'i ufia'w, amom ma'i basef hiafi ma'i atiasi ami nepe nili' dembinai ma amom. Owa' ina' magwamana anif basef, owa'atin. Tol mape dowaf.\*

**35** Ea' Jisas nape itapnofala amom mafi'i mape felefele' na'ipam na'i, "Epen ami ni'i netaga dembinai nepe nigali'i, anin ata' nili' netaga si'i nanda' maola anasi, netaga falafini ma naep epesi."

---

\* **9:30-31** Lu 9:45, 18:34    \* **9:33-34** Lu 22:24; Mt 20:25-27; Mk 10:43-44

**36** Ea' Jisas naso'mai anin awani sa'wini nahaponan la'afena amom nahapilan na'ipam na'i,\*  
**37** "Epen ami neso' opafa negatopalopa anin awani si'i ini'i ma okom ananimi mopoma ae', anin nase'e opaf ae' wapani natopalope. Ea' epen ami negatopalopa ae'i, ina natopalopa ae' atowe, owa'. Anin natopalopa anen nasapa'e agafi'ii wapani."\*

*Epen ami owa' bouni ape'inia, inimba alipini ape'ini*

(Lu 9:49-50)

**38** Jon nagwa basef na'amba na'i, "Dembinal, afa' wati anona aman nanda' maol natofa ambagof awami ma agol ine'igili. Apa' anen ina nagi'ma afa' owa', ea' dei' wasopamana."\*

**39** Owa' Jisas na'ipana Jon na'i, "Ipa' ina apestopamana, owa'i. Epen mamahina nanda' maol fasini ma agol ae'agili, anin ina a' ni'ipasa basef awafi ma ae', owa'." **40** Epen ami owa' bouni afe'inia, inimba alipini afa'ini.\* **41** Ae' a'ipipa endilisi, epen ami nitilipa ni'i ipa' epes ae'ipai ma netopalopepa nese'epa anin mai sa'wini si'i embel kwaia'umbel pea'ambal, owagama God nogwanman hiahaom fasimi anin.

*Waf awafi fagahambombaga epes sagahapifa Godi*

(Mt 18:6-9; Lu 17:1-2)

**42** Jisas na'ipas na'amba na'i, "I'i anin epen nenda' anin epen sa'wini nagahapifa ae'i, nefe' nenda' waf awafi, atiasi epen inimba nefi'

---

\* **9:36** Mt 10:40 \* **9:37** Nam 11:27-29 \* **9:38** 1 Ko 12:3

\* **9:39** Mt 12:30; Lu 11:23 \* **9:40** Mt 10:42

akafimi awami. Anis epes sofa' open inimba sondola otam lu'unai nila bini'w anani'wi sofa'an sofe' solan newala naoh mami lu'wami, ata' nepe andeande' kwasakwasala. Apa' i'i open inimba nenda' anin sa'wini negakwaha nagahapifa ae', open inimba atiasi nepe awen a'owa' nikila' negewala naoh laumi.\* <sup>43</sup> Ea' i'i lagof ipe'igufi fonda'epa pewa ma waf awafi, petopa'agof pekwhahogof. Ea' atogol atin fope, ma ambal lopaipa pegape andeande' lifilafi. Na'amba lagof agwafomba fanda' waf awafi fope, fofa'epa pefe' wambel awambili nif fagape lifilafima. <sup>44</sup> [Wambel ambalemba endihip sa'usa'umi namugopim atapim magape lifilafi, magagugumba epesi, ea' nif ifimba wapani ina hi'agalafi, owa'atin.] <sup>45</sup> I'i bo'wagah ipe'igahi honda'epa pewa ma waf awafi, petopa'agah pekwhahogah. Ea' atoga atin hope, ma ambal lopaipa pegape andeande' lifilafi. Na'amba bo'wagah agahemba handa'epa panda' waf awafii hope, hofa'epa pefe' wambel awambili, nif fagape lifilafima. <sup>46</sup> [Wambel ambalemba endihip sa'usa'umi namugopim atapim magape lifilafi, magagugumba epesi, ea' nif ifimba wapani ina hi'agalafi, owa'atin.]\* <sup>47</sup> I'i naep ipe'ipi penda'epa pewa ma waf awafi, pigip pikwhahip. Atom atin pepe ma pegafe' anamba God nagala'ambemagoma pegape andeande' lifilafima. Na'amba nam amamba manda'an nanda' waf awafii mope, a' mofa'an nef'e' wambel awambili nif fagape lifilafima.\* <sup>48</sup> Wambel

---

\* **9:42** Mt 5:30   \* **9:46** Mt 5:29   \* **9:47** Ais 66:24

ambalemba endihip sa'usa'umi namugopim atapim magape lifilafii, magagugumba epesi, ea' nif ifimba wapani ina hi'agalafi, owa'atin.\*

**49-50** “Anef nemaf epes hiasi hi'ilas sogame' akafimi lu'wami si'i nif monda'as sogape be'es hilili!. Sol usihili fasili ma gwa'aimi, apa' sol owa' usihilia, dei' atiasi penda'al pi'imama usihil wapani? Owa'atin. Ipa' panda' sola gwa'aisi usihi. Ea' ipa' na'amba atin si'i sol usihili, opalef ipe'ilifi atifilif pendaloma sahin owan hiasi petopalopas.”

## 10

*Jisas na'i sagawala wafafamba sandaso'amafi  
(Mt 19:1-12; Lu 16:18)*

**1** Jisas nakwaha wambel ambalemba, nafe' anep itap lu'upa Judiai nambo walemb Jordan gani fisana. Ea' amam nematawa hiasi safi'mai anen wapani, naso'asa basef si'i dondol nagawali-pas. **2** Ea' anom dembami Farisi maf'i mahali! Jisasa anif basef magwambana ma'i, “Mu'uli ape'ini andeande'ma anona aman nondaiwa'ma nemata'w anani'wi nogali'amona'w a'a owa!?”

**3** Ea' Jisas nagwamam basef na'ipam na'i, “Moses nase'epa mu'uli mamahina?”\*

**4** Amom magwamana ma'ipana ma'i, “Moses na'i aho'ma anona aman ni'i nogali'amona ako'wi, ni'i anif basef fil okwatip noso'akwap nili'amona'w kofe!.”\*

**5** Owa' Jisas na'ipam na'i, “Ipa' panda' du'waniga, dei' Moses nanda'mepa mu'uli

\* **9:48** Mt 5:13; Lu 14:34; Kl 4:6

\* **10:3** Diu 24:1-4; Mt 5:31

\* **10:4** Jen 1:27, 5:2

inimba. <sup>6</sup> Fowa' gani dambadamba God nanda' hiahaom hiami, 'Nanda' epes ea' sataga suwafisi numa'isi.\* <sup>7</sup> God na'ias na'amba na'i, 'Esis bias ina ata' sope si'i sagape daindai, owa'. Aman nokwaha mamasana ananisi nefe' noloma waulu'mana anani'wi, esis bias asope alop atotop. <sup>8</sup> Ea' esis bias sondaso'ama sotaga si'i alop atifip.' Esis ina ata' si'i sagape biasa sagape daindai, owa'. <sup>9</sup> Ea' hiahawes mais God a' nagapete'as sisihisi, isimba anin open ina nehape'as, owa'i."

<sup>10</sup> A'i owa' main, Jisas nao'wa alipumi ananimi mafe' mawis mape ipat, mahali'ana ma waf afamba sandaso'amafi.\*

<sup>11</sup> Jisas na'ipam na'i, "Aman ami nagakwaha waulu'mana anani'wi ma nagaso' ano'w daia'w wapanii, anen nanda' waf awafi so'a waola nemata'w akwamba nali' nagaso'akwi. <sup>12</sup> Ea' na'amba atin, i'i nemata'w ami kokwaha anona koso' anona daiana, ako'w kwawala waf bu'wafi kwatopa' daso'ama kwanda' waf awafi so'a waulafi ma anen nali' nagaso'akwi."

*Jisas na'ipasa baseffasifi ma esis awasi  
(Mt 19:13-15; Lu 18:15-17)*

<sup>13</sup> Ea' esis sao'wamanai anis awasi sa'wisi sofa'as safi'mai Jisas, sa'i anen nosa lagofa niga'ipasa baseffasifi awasi isimba. Owa' alipumi ananimi mandaiwa'ma esis awasi isimba ea' masopama esis sofa'as sogafi'mai anen. <sup>14</sup> Ea' Jisas nati amom manda' waf afambai, anen a' nembel awambela amom a' na'ipam, na'i, "Ipa' kwahowa awasi isimba sifi'mai ae'. Ipa' ina

---

\* **10:6** Jen 2:24; Ef 5:31 \* **10:10** Mt 5:32

Mak 10:15

liv

Mak 10:20

pihagasis, owa'i. Esis amam nematawa sogawis nomona maol Godi nope Dembinai nugumafiasi same' basef ananifi sagailif si'i awasi isimba.\*  
**15** Ae' a'ipipa endilisi, epen ami ni'i aho'ma God nope dembinaiman ama nese'ana nembel God si'i awasi isimba saga'i aho'mana, isimba sanda'as na'ambai atiasi sogawis anamba God nagala'am bemagomai. I'i owa', owa'atin."

**16** Ea' anen NASA'ma awasi isimba nahapilas satoma bo'wagah ananigahi nasa lagof ananigufi balagah asasigahi na'ipasa basef fasifi nowa' banagas.

*Aman hiahaom hiamunai  
(Mt 19:16-30; Lu 18:18-30)*

**17** Jisas nosafel nafe', anona aman nasagih nafi'mai anen nindiwa nembawa notawa naha'li'ana na'i, "Tisa bu'winai, ae' atiasi enda'maina egefa' ambal namili egape andeande' lifilafif!"

**18** Ea' Jisas na'ipana na'i, "Dei' maina ina' naga'i ae' bu'uwai? God atona anen bu'winai.\* **19** Ina' negawa mu'uli God nagaso' Mosesani naga'i, 'Ina' owa'i nenda' waf awafi so'a waulafi neha anis soga'a nenda' wal, owa'i, ina' owa'i nembaso'ma anis epes daiasa, ea' ina nembaso'am banagena ma negefa' anom hiahaom anasi dowadowaf, owa'i. Ina' neme' basef mamasinai nihapilif nilif nindimafias andeande!."

**20** Ea' aman anamba na'ipa Jisas na'i, "Tisa, mu'uli inimba hiani ahapilan ailan fowa' ata' awani afi'i afi'i ataga dei!."\*

---

\* **10:14** Mt 18:3    \* **10:18** Eks 20:12-17; Diu 5:16-20; Diu 24:14; Je 5:4    \* **10:20** Mt 10:38; Mk 8:34

**21** Ea' nomonas Jisasi sohafela anen saisailana, na'ipana na'i, "Ina' anef waf fasifi atetef owa' ata' nenda'afa. Ina' fo'o nese'asa hiahaom ine'imi ma anis daias sotalinama nef'a' moni inimba nenda'an neso' isimba kwahusi. Nenda'as na'amba ma anaf negefa' hiahawes fasisi gani ilif. Ea' nifi'i nihapifi nila ae'."

**22** Owa' aman anamba hiahaom hiamunai nandaiwa'ma nonda'am nogaso' anis epes daias. Ea' nomonas ananisi iwanis nandambema megahaihailana nafe'\*. **23** Ea' Jisas natologon ganigani na'ipa alipumi ananimi na'i, "Epes isimba ugai moni hianaisi sanda'am da nda' ahifim a'owa' ma sefe' sogawis nomona maol Godi nope Dembinai nugumafias. Atona atin sefe' suwisi."

**24** Ea' amom mosafel gogolalasoma basef ifimba naga'ipamafi. Owa' Jisas nagwamama basef wapani na'i, "Owape ae'ipai, ufia'w kwagafe' anambai ina andipa'wi, owa', ahifi'wi. **25** Anin mafin lu'unai kamel nogawis bolotaf nil sogosambala luwagufeli, anamba ila ina ahifima a'owa' ma nogawis. Apa' amam nematawa hiahaom hiamisi i'i sofe' sogawis nomona maol Godi, sonda'am da nda' ahifim a'owa' ma sofe' sogawis. Maol inimba ahifim a'owa' nikila' maol kamel nogawis bolotaf nili."

**26** Owa' alipumi ananimi mosafel gogolalasom kwapete'am manda'ipama ma'i, "I'i na'ambaiai, anaf God nuwambilai epes mamahisa nokwhomas waf awafi sotanimai sope andeande' lifilafai? Owa'atin."

---

\* **10:22** Mk 4:19; 1 Ti 6:17

**27** Ea' Jisas nasa'ma naep natiti amom na'ipam na'i, "Hiahaom epes owa' la'ifisa sonda'amia, amamba God atona banagonai ma nonda'am. Anen banagonai ma nonda' hiahaom hiami hi'igalam."

**28** Ea' Pita nasefela basef na'ipana na'i, "Neme', afa' wakwaha hiahaom afa'imi hiami, dei' wafi'i wahapifa basef ine'ifi wailina."

**29-30** Ea' Jisas na'ipana na'i, "Aho' endilisi, ae' aga'ipipa na'amba a'i, Ipa' epes ami ukup pegapoma ae' eloma basef bu'wafi Godi ma sokwaha ifagw gwoloma sahin owan ahadas mamasas a batawisas soloma aofah mais asasisi, atiasi asofa' hiahawes isimba dambaisi hiasi a'owa', sikila' asasisi fowa'isi. Ea' anis daias atiasi sehepa sonda'mepa was awafi. Apa' anaf owagama nogota bu'utai togataga, pefa' ambal namili pepe andeande' liflafi.\* **31** Apa' epes hiasi dei' sataga sagali'i agof fagatomasi, anaf agof akas asotaga sigi'. Apa' epes isimba sataga sagagi'i anaf a' agof fotomas sotaga sili'."\*

*Jisas na'ias wanifa nogaga' ma notanima nogosafel wapani*

(Mt 20:17-19; Lu 18:31-34)

**32** Esis saila ufia'w safe' sondowasa' Jerusalem, Jisas nafe' nali'as. Ea' alipumi ananimi magi'mana mafe'. Amom mogawa anen a' nafe' Jerusalem, na'amba dei' amom agogolalasom. Esis sagagi'ma amomi, esis wapani sogawa anen nofe' Jerusalem ea' ombel mahas.

---

\* **10:29-30** Mt 20:16; Lu 13:30    \* **10:31** Mk 8:31, 9:31

Ea' Jisas nao'wa alipumi atom mafe' mape anagon dei, na'ipam hiahaom amamba atiasi mogatagamanai.<sup>33</sup> Na'ipam na'i, "Peme!". Dei' afa' ea' ondowasa' Jerusalem. Ae' ataga epen egefa' alop epesi, atiasi anona aman nonda'e efe'ma amom pris dembami moloma amom dembami magawalipasa mu'uli Godi ea' monda' kotimi a' mi'i basef mondame'maefa mohe egaga!. Ea' monda'e efe'ma esis sogolalama Godi ma<sup>34</sup> sonda'salamala ae' sonda'e findiwae sisisi'wafe sopopagahowe ea' sehe ega!. Ama nimaguf bif hi'ilif, anef fefe' fegataga wanifi a' itanima esafel wapani."

*Jems naloma Jon ma'i mope dembami  
(Mt 20:20-28)*

<sup>35</sup> Jemsi Jon, Sebedi nogaopana mafi'i mahali' Jisas ma'i, "Dembinai tisa, afa' biafa wa'i uhali'ina ma anif basef ea' nenda'mafaef afa' biafa."

<sup>36</sup> Ea' Jisas nahali'am na'i, "Ipa' pa'i enda'mepa main?"

<sup>37</sup> Ea' ma'ipana ma'i, "Anaf owagama ina' netaga negefa' agol lu'wagili mogogala'i gani wambel Godi, nemaf afamba afa' wa'i ina' nenda'afa ope dembefa wil olomena wa'owa'ol anona nil wa'ol egawama a' anona nil wa'ol da'asaigilima."\*

<sup>38</sup> Owa' Jisas na'ipam na'i, "Ipa' bipa ina pegawa andeande'ma hiahawes pagahali'imasi, owa'! Ipa' banagepama pega' embela kap apamba dei' ega' embelapi, a'a owa'?" Jisas na'ipam na'amba

---

\* **10:37** Mk 14:36; Lu 12:50

ea' na'ipam wapani na'i, "Ipa' bipa banagepama pegefa' baptais isimba dei' egefa'asi a'a owa'?"\*

<sup>39</sup> Ea' magwamana ma'ipana ma'i, "Afa' ila la'ififai."

Jisas na'ipam na'i, "Endilisi, kap apamba dei' ae' ega' embelapai, a sa'of inimba atiasi egasa'ofani si'i baptaisi, isimba ipa' atiasi pegefa'asi. <sup>40</sup> Apa' pegape lagol kwahisigili o gagaili ae'agufi, isimba ina maol ae'ani, owa!. God atona ni'i esis isimba a' nandandepas ea'i dao', esis atis sope lagof kwahisigili gagaili ae'agufi."

<sup>41</sup> Ea' alipumi du'wanim ilifunamaim mame' amom biam ma'ias na'amba, manda' megahaha Jemsi Jon.\* <sup>42</sup> Ea' Jisasnofala amom hiami mafi'mai anen, na'ipam atin na'i, "Ipa' pegawa epes sogolalama Godi sa'i agufumi asasimi dembami, amom mape ilifa esis a'owa' manda'mas dondog manda'as kwapete'as. Ea' mape banagem a'owa' manda' esis amam nematawa sogaila malogof amamugufi.\* <sup>43</sup> Apa' waf afambai ina a' fepoma ipa', hapaifi. Aman ami nogape dembinai ma ipe'i, anen ata' nili' nope si'i nanda' maola ipa' hipaii.\* <sup>44-45</sup> Ae' ataga epen egefa' alop epesi ina afi'ima esis sonda'me maola sogatopalope, owa!. Ae' afi'i enda' maol egatopalopa ipa' hipai ma waf awafi fagawasipai. Ae' afi'i ma sehe ega' etala ipa' peloma epes hiasi igatawahipama waf awafi ipe'ifi. Ea' aman ami ni'i nogataga dembinai ma ipe'i, anen ata' nili' nope si'i agol akanai nonda'masa maol hiasi dowadowaf."

---

\* **10:38** Ap 12:2; Re 1:9   \* **10:41** Lu 22:25-26   \* **10:42** Mt 23:11;  
Mk 9:35   \* **10:43** 1 Ti 2:5-6

*Anona aman naep pagaso'anai Jisas nanda'ana bo'ona  
(Mt 20:29-34; Lu 18:35-43)*

<sup>46</sup> Jisas nao'wa alipumi ananimi mafe' mataga Jeriko. Ea' ma'i mokwaha Jeriko mefe' moloma amam nematawa hiasi, mataga ufia'w kwagawisi wambili, owa', anona aman naep pagaso'anai Bartimeas, nogama Timeusi, tol nape felefele'ma ufia'w. Anen nape nandailasa otamba gwa'aisi mais sogaso'ana.\* <sup>47</sup> Bartimeas name' basefa Jisas Nasaretinai nafi'i nape, ea'nofalana mehip na'i, "Jisas, akunamana Deviti, ina' niti ae' uwahipiwi."

<sup>48</sup> Owa' esis hiasi sinifalona sa'i, "Ina' sopama malogol."

Owa' anen fala atin nape na'i, "Jisas ina' akunamana Deviti, netelowe uwahipiwi."

<sup>49</sup> Ea' Jisas nafi'i nalutu na'i, "Falana nifi'mai."

Ea' sa'ipana sa'i, "Nomonas banages. Safel! Jisas a'nofalinai."

<sup>50</sup> Ea' anen nakwaha saket ananitai nosafel kwafalis nafe'ma Jisas.

<sup>51</sup> Ea' Jisas na'ipana na'i, "Ina' na'i ae' enda'mena main?"

Ea' na'ipana na'i, "Dembinai tisa, ae' a'i iti ande-ande' wapani."\*

<sup>52</sup> Ea' Jisas na'ipana na'i, "Ipa' fo'o. Ina' ea' nahapifa ae' banagiwai ma anda'ena bo'wena wapani."

Ea' kwafalis atis naep apatiana andeande' nagi'ma Jisas nafe' ufia'w.

---

\* **10:46** Mt 9:27, 15:22 \* **10:51** Mk 5:34

# 11

*Jisas nondowasa' nafe' nawis Jerusalem si'i  
anona dembinai king*

*(Mt 21:1-11; Lu 19:28-40; Jo 12:12-19)*

<sup>1</sup> Jisas naloma alipumi ananimi mafe' mataga felefele'ma Jerusalem, ea' mataga Betfagai Betani walemb ambalemba bialemb, felefele'ma halafuta Oliv. Ea' Jisas nasapa' alipumi ananimi biam <sup>2</sup> na'ipam na'i, "Ipa' bipa pefe' wambel bambalimba bagape gani wa'ili felefele'ma na'ai. Pefe' piwis wambel ambalemba, piti anona donki sa'unai sandolana nail. Ina dei' anona aman a' natomana, ata' owa'atin. Petagwahona pefa'ana pifi'mai ae'. <sup>3</sup> I'i anin epen nigahali'ipa niga'i, 'Ipa' pafi'i panda'as na'amba ma main?' Ipa' pi'ipana pi'i, 'Dembinai afa'inai na'ipafa na'i nonda' maolana ma bola nosapa'ana notanimamipai kwafalis.' "

<sup>4-5</sup> Ea' amom biam mafe' mati anona donki sa'unai sapete'ana nail ipat uta ando' felefele'ma ufa'w. Amom ata' matagwahona atin owa', anis salutu felefele' sahali'am sa'i, "Ipa' patagwaha donki anamba ma main?"

<sup>6</sup> Ea' ma'ipas si'i Jisas doko' naga'ipam. Ea' sa'i aho'ma amom mogofa' donki anamba.

<sup>7</sup> Ea' mofa'ana mafi'mai Jisas, mawamona sagegw amamugwi gwatoma donki anamba Jisas natomagw. <sup>8</sup> Ea' esis hiasi sandombamana sagegw ufa'w. Anis satopa'i apulita lawah hogatawa aof felefele'i saso'wiam ufa'w sofalo'ma'w.\* <sup>9</sup> Esis hiasi sali' sagi' safela

\* **11:8** Sam 118:25-26

ao' aligil na' amba sa'i, "Hosana. Apa' mandanifal endilisi ma ina'. Apa' ma'i Godnofalo'ma ina' nagaf'i agol ananigilii nese'ena banagami ma nenda' maol ananini. <sup>10</sup> Fowa' gani God nanda' akunamapa ape'inai Devit nepe dembinai ma esis nugumafias. Dei' awi God nonda' ina' andeande', nepe Dembinai ma apa' nimafiapa si'i Devit fowa' nepe dembinai nugumafias. Hosana. Apa' mondafela agol Godi golota ilif endilisi."

<sup>11</sup> Ea' Jisas nataga nawis Jerusalem nefe' nawis ipat Godi lu'unai. Nawis nati hiahaom nefe'ma hi'alam, awin na'i a' newala, nao'wa alipumi 12-pelaim ananimi mafe' Betani.

*Jisas na'ipa anoga lawag agiligama fik nowa'mefaga ma ina ata' gil gola sa'utip wapani, owa'*

(Mt 21:18-19)

<sup>12</sup> Wafilu Jisas naloma alipumi ananimi mohafel makwaha Betani mafi'i atin, owa' Jisas a' nolomahana.\* <sup>13</sup> Ea' nalutu nati anoga lawag agiligama fik gotawai laogon felefele', agog a' apuliga. Ea' nefe' felefele' nowando'ma sa'utip. Apa' ina nati anip pailaga, owa'. Nati apul atom. Nogota gogailatai ata' owa' totagaea.\* <sup>14</sup> Ea' Jisas na'ipaga na'i, "Ina ata' nil nela anip sa'utip wapani, a' owa'atin endilisi."

Ea' alipumi ananimi mame' basef ifimba naga'ipagaefi.

*Jisas nali'amona amam nematawa sagatala hiahaom ipat lu'unai Godi sawisi ando'*

(Mt 21:12-17; Lu 19:45-48; Jo 2:13-22)

---

\* **11:12** Lu 13:6    \* **11:13** Mk 11:20

<sup>15</sup> Jisas naloma alipumi ananimi mafe' mataga Jerusalem, ea' nawis ipat lu'unai Godi nali'amona esis hiasi sanda' bisnisi saloma isimba sagatalom ipat anamba nomoni sawisi ando'. Anom amam mati otamba anisi mindisila'mamba. Ea' Jisas nambema tebolifah amamisi nakolo'was. Anis sanda' bisnisa sogatala amiguf ma'unamb. Ea' nambema siaifah asasisi nakolo'masas wapani. <sup>16</sup> Ea' nanda'imagon na'i, "Ina ata' sofa' anom hiahaom amamba suwisi nomon wapani ipat anamba sandakolas sagapoma, a'owa!."\*

<sup>17</sup> Ea' na'ipas basef Godi fagail Baibeli na'i, "Ipat ae'anai nondapoma esis sagape ganimba walemb hiagomai ma sifi'i sopaona sondabeten sogahali'i. Apa' owa', a' panda'ana nataga si'i sandambaho' sanda' wala."\*

<sup>18</sup> Amam nematawa hiasi gogolalasia basef ananifi. Isimba atis pris amamba dembami maloma dembami mogawalipasa mu'uli Godi a' om-bal bahama anen. Ea' mala' molaoma uchia'wa mohana nogaga'. <sup>19</sup> A'i owa' wambomota, Jisas nao'wa alipumi ananimi makwaha Jerusalem a' mafe'!\*

*Ami nihapifa God nendabeten nihali'ana a' nef'a' hiahawes*  
(Mt 21:20-22)

<sup>20</sup> Wafilu kuhimbita atota Jisas naloma alipumi ananimi mafe' mati lawag agamba fik bowaga aliga, soh haloma nombalef alim hi'alam. <sup>21</sup> Pita natologa, okom mapoma Jisas naga'iefi basefa lawag agamba ea' na'ipana na'i, "Dembinai tisa,

---

\* <sup>11:16</sup> Ais 56:7; Jer 7:11   \* <sup>11:17</sup> Mk 14:1   \* <sup>11:19</sup> Mk 11:14

ina' niti lawag aga'e nambati' ina' naga'ipagai, a'  
aliga hi'alaga."

**22** Ea' Jisas nagwamama basef amom na'ipam  
na'i, "Ipa' pihapifa God.\* **23** Endilisi ae' a'ipipa,  
epen ami owa' okom bimbafim mopoina ma  
anin okom atifim nihapifi endilisi ni'ipa ha-  
lafuta tatumba ni'i, 'Ina' dagia a' nefe' newala  
naoh,' endilisi God atiasi a' nonda'am motaga  
si'i anin okom mandanda'.\* **24** I'i ipa' pi'i pend-  
abetenanis maemaefah pi'i pefa'as, ipa' pi-  
hapifa God endilisi pendabetenanis pi'i, 'Aho' endil-  
isi, afa' atiasi ogofa'asi,' Ma atiasi pefa'as si'i  
paga'ias.\* **25** Afamba ipa' pilutu pendabetenanis,  
pekwahomasa wafawafi anis sanda'mepafi, ukup  
pese'epaf. Ama Ahamepa nagape heveni okom  
mogaso'anafa ipa' wapani. **26** [Ap'a ipa' i'i owa'  
ukup pese'epafa, Ahamepa nagape heveni ina  
okom moso'anafa ipa', owa'atin.]"

*Amom mahali' Jisas ma'i, "Ami na'ipina ma ne-  
gape dembinai?"*

*(Mt 21:23-27; Lu 20:1-8)*

**27** Ea' Jisas naloma alipumi ananimi mafi'i  
Jerusalem wapani, ea' nafe' nawis ipat lu'unai  
Godi sandakolasa. Anen ata' nafe' atin, owa' pris  
dembami maloma anom dembami magawalipasa  
mu'uli Godii maloma agufumi esis Judai mafi'mai  
anen. **28** Ea' mahali'ana ma'i, "Ina' nefae' agol  
maigila dei' nanda' waf afambai? Ami na'ipina  
ma negape dembinai ma nanda' maol inimba?"

---

\* **11:22** Mt 17:20   \* **11:23** Mt 7:7   \* **11:24** Mt 5:23; Mt 6:14-15

<sup>29</sup> Ea' Jisas nagwamam basef na'i, "Ae' wapani, a'i ihali'ipa ma anif basefa ipa' ata' pili' pi'ipif ae', ma bola iga'ipipa ami na'ipi ape dembiwai anda' maol inimba. <sup>30</sup> Jon nagapisi' amam nematawa hiasi, ami na'ipana napis'i'as? God nagape heveni na'ipana napis'i'as a'a anin open itapani na'ipana? Ipa' pegwamef pi'ipif."

<sup>31</sup> Ea' mame' basef ifimba manda'ipama ma'i, "Afa' uga'i, 'God nagape heveni na'ipa Jon nagapisi'as,' na'amba atiasi a' ni'ipa afa' ni'i, 'Dei' maina ipa' owa' pegahapifanaia?' <sup>32</sup> Apa' afa' uga'i, 'Anin open itapani na'ipana nagapisi'as,' na'amba esis amam nematawa a' sohafa."

Dei' main, esis hiasi sa'i Jon anen profet endilisini. Amom a' ombele mahama esis. <sup>33</sup> Ea' magwamana basef ma'i, "Afa' owa' ogawama."

Ea' Jisas na'ipam na'i, "Ae' na'amba atin, ina i'ipipa ami nase'e banagami na'ipi anda' maol inimba ae'ani."

## 12

*Basef waminif atina amam awami mugumafi aof*

(Mt 21:33-46; Lu 20:9-19)

<sup>1</sup> Jisas nanda' anif basef waminif atina esis na'i, "Anona aman nanda' anof aof nagawa waina na-hefagomaf. Aof afamba nomon nanda' anona tang notawa ma sogafa'asa sa'utip ipimba wainip. Anen nala' anota ipat lautai totawa ma sope sugumafiagon. Ea' nakwahomam aof afamba anom amam ma'i monda' maolanaf. Anen nafe' napani anambel wambel lauguni.\* <sup>2</sup> Ama nogota sa'utip

---

\* **12:1** Ais 5:1-2

pagailatai, anen kofagonama aof afambai nasapa' anona nanda' maoli nafe' ma amom manda' maol aof ananifi. Ea' na'i amom moso'ana anip sa'utip gwa'aipi ma aof afamba. <sup>3</sup> Owa' mombalo'ana mahana mali'amona notanima nafe' dowaf. <sup>4</sup> Ea' anen kofagonama aofi nasapa' anona daiana nafe' wapani ma mogaso'ana anip sa'utip. Owa' mombalo'ana wapani mahana mawala balagana manda'ana kwapete'ana. <sup>5</sup> Ea' kofagonama aofi nasapa' anona daiana nafe' wapani owa', a' mahana afuna, kofagonama aofi nasapa' anom hiami mafe'. Owa', mahami atin anom afum.\* <sup>6</sup> A'i owa' nagi' nasapa' atotona nagapani wapani. Anamba nogamana ananinai. Nomonas ananisi sohafel sagasagailanai a'owa'i. Ea' nasapa'ana nafe'ma amom manda' maol aofi. Anen kofagonama aofi na'ias na'i, 'Atiasi ila, amom a' meme' malogol nogame ae'anai. <sup>7</sup> Owa' amom mati anen nafi'i manda'ipama atin ma'i, 'Aman nanumba ma'una owagama nogofa' hiahaom hiami ahamanai. Awi a' ohana afuna, ma afa' atofa ogofa' aof afa'e.'\*

<sup>8</sup> Ea' mombalo'ana mahana afuna makwaha alop ananinai nawis na'oh aof ando'. <sup>9</sup> Ea' atiasi anen kofagonama aof afambai nondi' maina amom? Atiasi nifi'i a' noham a' afum hi'ilam, noso'asa aof afamba fefe'ma anis epes daias.\* <sup>10</sup> Ipa' patalifa basef Godi pegawef ea'. Basef Baibeli faga'i na'amba fa'i, 'Otam amamba magala' ifagwi mogelefatami dei' mataga mape otam banagami mape magali'i mogombalo' ipati. <sup>11</sup> Dembinai nanda' amamba mataga, apa'

---

\* **12:5** Mt 3:17 \* **12:7** Hi 13:12 \* **12:9** Sam 118:22-23

matolom fasifasim a'owa' agogolalasapa.' ”

**12** Ea' amom agufumi esis Judai mogawa anen na'i basef ifimba waminif atini nondola'waifa amom. Ea' ma'i a' mombalo'ana. Owa', ombel mahama esis amam nematawa hiasi. Ea' makwahona mafe! \*

*Amom mahali' Jisasa esis sogaso'ana takis Sisar dembinai gavman nagali'ma esis Romi  
(Mt 22:15-22; Lu 20:20-26)*

**13** Ea' amom agufumi Judai masapa' anom Farisi maloma anom daiam mini'ap Heroti mafe'ma Jisas ma'i meme' anif basef ananifi owa' andeande'ia ma monda'mana basef mogowa'ana si'i sogapalo' agof anembeh. **14** Amom mafi'i makikipana ma'i, “Dembinai Tisa, afa' ogawena ina' aman naga'i endilisii. Owa' nigal'ipasa anif basef isimba anis agof lu'wagufisia a anif basef daifa isimba agof akasi falafisia, owa'atin. Ina' naga'ipasa basef endilisifi atif Godi amam nematawa hiasi dondo' atin hi'agalafi. **15** Mu'uli ape'ini na'i andeande'ma apa' mogaso'ana takis Sisar gavman dembinai esis Romi, a'a owa'?”

Owa' Jisas a' nogawa baso'am amamini na'ipam na'i, “Dei' maina ipa' pagagwamba ae'? Fa'mai anin moni atitina ata' itilin.”

**16** Ea' mofa'manani ma natilin nahali'am na'i, “Ambal laloma agol isimba sagaili amisi?”

Ma'i, “Isimba Sisari gavman dembinai.”\*

**17** Ea' magwamam na'ipam na'i, “Dao' hiahawes isimba dembinai Sisari pese'anas Sisar. Apa' hiahawes Godi, pese'anas God.”

---

\* **12:12** Mk 3:6    \* **12:16** Ro 13:7

Ea' amom gogolalasom nomonas hiahawesa anen.\*

*Amom mahali' Jisasa sagaga'i a' sogosafel wapani*

(Mt 22:23-33; Lu 20:27-40)

<sup>18</sup> Anom amam anep mini'ap Sadyusi amom mini'ap apamba ma'i sagaga'i ina atiasi sotanima sosafel wapani, owa'atin. Ea' mafi'mai Jisas mahali'ana ma'i,\* <sup>19</sup> "Dembinai Tisa, fowa' Moses nanda' anif basef fagail buki ma apa'i fa'i, 'I'i anona aman nog'a', ma anen awasi akana, waulu'mana ata' kope, owamana ananinai a' noso'akw nola anis awasi ma sogaha'ofana.' <sup>20</sup> Ea' amom wambota atotota 7-pelaim mape. Nagali'i sahomam naso'akw awani aka'w naga' nakwaho'w kwape. <sup>21-22</sup> Ea' owamana nag'i naso'akw, naga' nakwaho'w kwape awani aka'w. Ea' owapam mandatu'umi manda'as na'amba atin, maso' nemata'w akwamba maga' atin hi'alam mafe' mafe'ma matagama owagufunai akutainai. Amom amamba ambipim ina mola anis awasi, owa'. Mandaga' atin. Ama main, waulu'mam kwagi' kwaga' kwagi'mam. <sup>23</sup> Ea' anaf esis sagaga'i sogosafel wapani, nemata'w akwamba kopoma mamahonama? Amom 7-pelaim a' maso'akw atin hi'alam kwape waulu'mam amamu'wi."

<sup>24</sup> Ea' Jisas nagwamam basef amom na'i, "Ipa' owa' pegawa basef Baibel naga'iefia, ea' owa' pegawa banagami Godia. Ipa' dei' ina pa'i basef andeande', owa'atin. <sup>25</sup> Nemaaf afamba sagaga'i

---

\* **12:17** Ap 23:8    \* **12:18** Diu 25:5

sokwaha wandelef sogosafel wapani, amam nematawa ina ata' sondaso'ama wapani, a' owa'atin. Sope dowaf si'i ensel magape heveni.\* **26** Basef ifimba ma sagaga'i sotanima sogosafel wapani, ipa' patalifa basef fagail buk Baibeli, fowa' God naga'ipanaef Mosesi. Basef ifimba fa'i nif ileliwa wagataga ma lawag sa'ugai fagandogai. Basef ifimba God na'ipa Moses na'i, 'Ae' God Abrahami, Aisaki, a Jekopi.' **27** Basef ifimba faga'i Dembinaii, anen ina God epes sagaga'ii, owa'atin. Anen God epes isimba ambal lapais sagape namisi. Ea' basef ipe'ifi ina endilisifi. Ipa' ina pegawef andeande', owa'atin."\*

*Mu'uli Godi nikila' mu'uli hiani apa' magahapi-fani*

(Mt 22:34-40)

**28** Anona aman dembinai nagawalipasa mu'uli Godi nafi'i, name' amom ma'i maloma Jisas mandahihianama basef. Ea' name' Jisas nagwamam basef bu'wafi atif.

Ea' nahali'ana na'i, "Mu'uli Godi apa' magahapi-fani hiani. Apa' mu'uli mamahina lu'win nikila' mu'uli daian hiani nepe nagali'i?"\*

**29** Jisas nagwamana basef na'i, "Mu'uli nagali'i inimba. Ipa' Israel, ipa' peme'! Dembinai God ape'inai, anen atona Dembinai. **30** Nomonas ipe'isi sohafela dembinai God ipe'inai sisilana na'amba. Ukup ipe'ipi pipilana hi'indalep, pese'ana ambagufi nelelemb soloma pepel ipe'isi pendaso'anas hi'indalasa Dembinai God atona.\*

\* **12:25** Eks 3:2,6

\* **12:27** Lu 10:25-28

\* **12:28** Diu 6:4-5

\* **12:30** Lev 19:18

**31** Ea' mu'uli nagafe'ma bifi inimba. Ipa' ukup pipila anis epes sagape felefele'ma ipe'i si'i ukup pagapagaila ipa' atipa. Owa' anin mu'uli nikila' mu'uli inimba biafina, owa'atin."

**32** Ea' aman anamba na'ipa Jisas na'i, "Dembinai, ina' na'ias andeande!. Aho' God atona anen Dembinai, anen atona nape. Owa' anona aman nope dembinai si'i anona.\* **33** Aho', mu'uli lu'wani nagali'i inimba. Nomonas ipe'isi so-hafela anen sisilana na'amba. Ukup ipe'ipi pipilana hi'indalep, pese'ana nelelembi gawa soloma pepel ipe'isi hi'indalas. Na'ambai andeande!. Ea' mu'uli nagagi'i inimba. Ipa' piti uwahipis nomonas sisila epes ami sagape felefele'ma ipe'i si'i ipa' nomonas sagaila ipa' atipa. Na'ambai andeande!. I'i apa' mugaila mu'uli inimba biafin, waf afambai bu'wafi fikila' gwa'aisi mafis main mogaso'anas Godi ata' be'es kwasakwasala."

**34** Jisas name' aman anamba nagwa basef si'i aman gawa bu'waninai. Ea' na'ipana na'i, "Ina' ata' nogota laota ma nigawis nomona maol Godi nope Dembinai mugumafina, owa!."

Ea' amom hiami ombel mahama mogahali' Jisasa anif basef wapani.

*Jisas nahali' esisa Krais  
(Mt 22:41-46; Lu 20:41-44)*

**35** Jisas nape ipat lu'unai Godi naso'asa basef esis amam nematawa na'i, "Amom magawalipasa mu'uli Godi ma'i, 'Krais, aman anamba God nan-dandepana nogafi'ii, Devit akunamana. Ea' ma'i Krais aman atona dowaf itapanai. Dei' maina

---

\* **12:32** Diu 4:35; Ais 45:21; 1 Sml 15:22; Hos 6:6

maga'ias na'amba ma Krais?\* <sup>36</sup> Ambal bu'unai Godi nasa'ma Devit na'i, 'Dembina God na'ipa Dembinai ae'anai na'i, "Ina' nepe lagol kwahisigili ae'agili atapina nefel netagama ae' enda' bousi ine'isi sogafe'lafela bo'wagah ine'igahi." <sup>37</sup> Aman anamba king Devit fowa'nofala Krais na'i Dembinai. Isimba atis dei' Krais ina aman atona falafunai, owa'. Anen dembinai."

Ea' amam nematawa hiasi sonahaha sagame' basef ananifi.

*Amom magawalipasa mu'uli Godi waf amamifi awasif*

*(Mt 23:1-36; Lu 11:37-54, 20:45-47)*

<sup>38</sup> Jisas nawalipas na'ipas na'i, "Ipa' solawaipa ma amom dembami magawalipasa mu'uli Godi. Amom ma'i mowaho' luwaguf laumi atom mondafe'ma esis sotoloma siga'i amom dembami manda' waf fasifi. Amom ma'i mope anamba esis hiasi sandatama sagapoma ma sotoloma sondalalamam soganifelom. <sup>39</sup> Amam amamba ukup pa'i mondape siaifah isimba sotawa sagali'i atis, dembami atom magapoma nomon ifagw esis Juda sandakolasugwi a'a anamba hiasi sandakolas nimaguf ifimba sanda' gwa'aimi lu'wami ma hiasi sogatolom. <sup>40</sup> Amom magawis ifagw agwamba nematawa alifiwaii, mawis manda' wala hiahawes awousi. Ea' mosafel malutu mandabeten launai dowadowafa esis sotolom siga'i amom bu'wami. Anaf God nowaloga epes hiasi. Anis epes daias owa' sonda' waf awafi na'ambaia anaf sofa' akafimi

---

\* **12:35** Sam 110:1

kwasakwasala, apa' amom a' mofa' nimanimi a'owa' lu'wami endilisi.”\*

*Nemata'w kwahu'wi kwaso'ana moni sa'wini bi-afin God kwanda' ofa*

(Lu 21:1-4)

<sup>41</sup> Jisas nepe nomon ipat lu'unai Godi, nepe felefele'ma bokis moni nagalasi. Anen nepe nati amam nematawa safi'i sagala moni negewala bokis. Amam nematawa isimba moni hianaisi sala moni hiani. <sup>42</sup> Apa' ano'w nemata'w alifi'wi kwafi'i kwala moni sa'wisa'wini biafin si'i 10 toea newala bokis isimba.\*

<sup>43</sup> Ea' nofala alipumi ananimi mafi'i na'ipam na'i, “Ae' a'ipipa endilisi, nemata'w akwamba alifi'wi kwa'waha moni lu'wani nikila' moni hiani amam nematawa hiasi sagalani. <sup>44</sup> Epes isimba hiasi moni hianai na'omas, sala du'wanin atin newala bokis. Apa' nemata'w akwamba, moni aka'w endilisi, ako'w kwala moni ako'uni hi'alan. Ea' owa' anin ne'eha kogatala gwa'isia, a' owa'atin. Ea' moni ako'wini biafin sa'wini a' nikila' moni hiani esis sagalani hi'alan.”

## 13

*Jisas na'i ipat lu'unai Godi anaf anis a' suf'i sugulatona*

(Mt 24:1-2; Lu 21:5-6)

<sup>1</sup> Jisas nepe nomon ipat anamba lu'unai Godi. Ea' na'i nokwaha ipat anamba nuwisi ando', anona alipunai ananimi nafi'i na'ipana na'i, “Tisa,

---

\* **12:40** 2 Kin 12:9    \* **12:42** 2 Ko 8:12

ina' niti ifagw amamba fasifasimi. Sanda' otamba lu'wami sanda'am suwasuwaim.”\*

<sup>2</sup> Ea' Jisas nagwamana na'ipana na'i, “Ina' nati ifagw amamba lu'wami, a'a? Anaf ina anemba otamba bendatomama atin banagemba bepe, owa'atin. A sugulatam sowalom hi'ilam mofe' mo'oh atona atin hi'ilam.”

*Jisas na'i nimanimi akafimi hiami a' motaga  
(Mt 24:3-14; Lu 21:7-19)*

<sup>3</sup> Jisas nape halafuta Oliv ea' nati ipat lu'unai Godi notawa do'wan wa'ol. Ea' Pita naloma Jemsi Jon a Andru atom mafi'mai anen mahali'ana ma'i, <sup>4</sup> “Ina' ni'ipafa hiahaom amamba nambai' motaga? Ametal mail lili' lotaga ma apa' mogogawa hiahaom amamba felefele'ma mogataga si'i dei'aol naga'ipafa?”

<sup>5</sup> Ea' Jisas na'ipama basef laufi na'amba na'i, “Ipa' solawaipa. Na'amba anin epen a' nembaso'mepa. <sup>6</sup> Dei' main, amam hiami anef nemaf mifi'i mombaso'mepa mi'i agol ae'agili mi'i, ‘Ae' ma'uwi ae' Krais, God nandandepe nasapa'e agafi'ii.’ Ea' atiasi amom mombaso'ma amam nematawa hiasi. <sup>7</sup> Anef nemaf peme' amalemba wandaf anis sondaha basefa wandaf si'ipipaf, apa' ipa' ina ombal mehepa, owa'i. Hiahaom amamba atiasi mogatagai, apa' nemaf akutaifi ata' ota!.\* <sup>8</sup> Anis epes sagape anamba itap lu'wagoma sofela wandaf sopa' soloma anis sagape anep itap daiapi. Anona dembinai king no'wa anis walemb hielimbi ananisi sopa' soloma anona dembinai king daiana no'wa

---

\* **13:1** Lu 19:44    \* **13:7** Ais 19:2; 2 Kro 15:6

ananisi analemb walemb. Analemb walemb hiagoma atona atin itap bol atin nope, ea' anis epes hiasi sagape analemb walemb nolomohas sope. Hiahaom amamba ata' muli' motaga si'i akafimi mali' magatagama nemata'w kwa'i kogola awani. Apa' akafimi anaf migi' mogatagai a' lu'um a'owa' mikila' amamba mogali'.\*

<sup>9</sup> Ipa' solawaipa andeande'. Anaf sonda' komtipa ma gavman dembami asasimi. Ea' sehepa nomon ifagw Juda sandakolasugwi. Ipa' pagame' basef ae'afi pagaila ae'i isimba atis dei' sondaiwa'mepa sonda'epa pilutu nogohnaep kingi moloma gavman dembami ma pegawalapa basef ae'afi bu'wafi piga'ipasef. <sup>10</sup> Alipisi ae'asi ata' sili' sofe' walemb hiagoma si'ipa amam nematawa hiasi some' basef bu'wafi Godi fili'. Ama main nemaf akutaifi figi' fetaga.\* <sup>11</sup> Afamba esis sowalapepa sofa'epa pegafe'ma kot, ipa' ina ombel mehepa a pi'i, 'Atiasi afa' wi'i basef maif?' Owa'. Basef hiafi God nogasi'ipafi ma nogota atamba atota, ifimba ipa' pewalapef. Ifimba ina basef ipe'ifi atif, owa'. Ambal bu'unai Godi atona nowalapefa ipa' pi'if.\* <sup>12</sup> Anef nemaf esis atis sahin owan sondanda'ma kot, sohas afis. Ea' ahapas sonda'am na'amba atina esis nogaopas asasisi. Ea' batawisas wapani sonda' kotima masmas asasisi anis sohas afis.\* <sup>13</sup> Atiasi epes hiasi walemb hiagoma nelelemb numbutima ipa' kwapete' endilisi. Esis sati ipa' pagaila basef ae'afii, na'amba dei' sahepa. Apa' epen ami ni-

---

\* **13:8** Mt 10:17-20    \* **13:10** Lu 12:11-12    \* **13:11** Mt 10:21

\* **13:12** Mt 10:22; Jo 15:21

hapifi banagen nilutu negataga nemaf akutaifi, inimba atiasi God nuwambilan nokwahoman waf awafi ananifi nitanimai nepe andeande!.\*

*Hiahaom awami endilisi anef nemafa' motaga  
(Mt 24:15-28; Lu 21:20-24)*

**14** “Anef nemaf ipa' piti hiahaom awami mogahambombaga hiahaom bu'wamii motaga mogape nomon ipat lu'unai Godi. God nandaiwa' endilisi ma hiahaom amamba awami mogape nomon ipat ananinai.”

(Epen ami negatalifa basef ifimbai, anin a' okom mondapomef andeande!).

Ea' Jisas na'ipa alipumi ananimi wapani na'i, “Nemaf afamba amam nematawa sagape itap lu'wapi Judiae sofa' sefe' sondowasa'o halafutagw.\* **15** Ea' epen ami nagape ipat ando'i ina ata' netanima niwis nefai hiahawes ananisi ipat nomon, owa'i. Anin a' nefai nendafo'o mehip.

**16** Epen ami nigail aofi, ina ata' nitanima nefai wambel nefai saket main ananisi, owa'i. Anin a' nefai nendafo'o mehip.\* **17** Nematawa opafuwai waloma awamba awasi ota'asi saga' nomagof atogufi, ae' a'i awo uwahipiwa endilisi ma nogota atamba ogame' akafimi lu'wami. **18** Ipa' pendabetena hiahaom amamba akafimi ina motagamepa nogota atamba fufini asaf sogatagatai.\*

**19** Nogota atamba akafimi mugatagai lu'wami endilisi. Fowa' dambadamba itap pagataga nafi'i nafi'i natagama dei', nimanimi awami amambai ina anom na'ambaimi mataga, owa'atin. Ea' anaf

---

\* **13:13** Dan 9:27, 11:31; Dan 12:11 \* **13:14** Lu 17:31 \* **13:16**

Lu 23:29 \* **13:18** Dan 12:1; Joe 2:2; Re 7:14

wapani ina atiasi anom nimanimi amambai motaga, owa'atin. <sup>20</sup> I'i God owa'nonda' nimaguffefe' bandefa, atiasi amam nematawa hiasi higilgalasi hi'ilas. Owa' owa'atin. Apa' God okom mapoma epes isimba anen nandandepas ea'i, dei' nahagasa nogota atamba bandata. <sup>21</sup> Nemaf afamba fetaga ma i'i anis epes si'ipipa siga'i, 'Ipa' piti Krais, God nasapa'ana nagafi'ii, anen nape na'a, o nani nape gani, ipa' ina pihapifas, owa' hapaisi.\* <sup>22</sup> Atiasi anom amam mombaso'am muga'i amom Kraisi a'a muga'i profeti, a' motaga monda' ametal hiahaom banagami mamimami monda' banagami hiami si'i God nanda'ami. Endilisi i'i amom banagema, a' mombaso'ma amam nematawa God nosaho'as ea'i mohambombagas. Apa' owa', owa'atin. <sup>23</sup> Ea' ipa' a' solawaipa andeande'. Ae' ali' a'ipipa ea' ma hiahaom amamba nimanimi akafimi anaf mugi' mugatagai.\*

*Anef nemaf Jisas notanima nifi'i  
(Mt 24:29-31; Lu 21:25-28)*

<sup>24</sup> "Akafimi nimanimi hiami ma nogota atamba hi'ilam ea', kwafalis atis awin alipini a' netaga owamb, ea' owambini ina ata' negala', a'owa'. <sup>25</sup> Ea' ondowa mowai otaga ilif, hiahaom hiami banagami magape otagai ea' bol atin mope. <sup>26</sup> Nogota atamba esis siti ae' ataga open egefa' alop epesi eloma ilagw otaga ilif ifi'i eloma hiahaom mogogala'i fasimi Godi moloma banagami ananimi.\* <sup>27</sup> Nogota atamba ae' igafi'i esapa' ensel amamba ae'ami mofe' itap

---

\* **13:21** Diu 13:1-3; Re 13:13 \* **13:23** Re 8:12 \* **13:26** Mt 13:41

hiagoma awin natafima negewalama lambilif anamba wa'owa'ol biafigin biafigin mefe'agon hi'ilagon ganimba itapi otaga safe' sogotambela. Atiasi ensel amamba mefe' mofa'ai esis amam nematawa God nogosaho'as ananisii sondakolas atogon.

*Lawag fik ganda'as gihimba'mapa mogogawa nogota atamba hiahaom mogataga atai  
(Mt 24:32-35; Lu 21:29-33)*

**28** “Ipa' nomonas sondanda'ma anif basef waminif atina ilaof. Ipa' piti ilaof nogonafa ma basowa, pegawa nogota atamba nelemb ea' felefele'ma sogaof.”

**29** “Ea' na'amba atin anaf piti hiahaom amamba ae' ali' aga'ipipami mogataga, ipa' pegawa ae' afi'i alutu felefele'ma uta. Ina ata' nogota laota, owa'.

**30** Ae' a'ipipa endilisi, amam nematawa dei' pagape itap apa'i ata' pagapani ina atiasi apegap'ulal, ata' owa' ipa' piti esis ea' siti hiahaom amamba motaga hi'igalam. **31** Otaga noloma itap hiagoma anaf a' higililam hi'ilam, apa' basef ae'afi ina anaf higililif, owa'atin endilisi. Fegape atapif liflafii.

*Ina anin epen negawa nemaf hiahaom amamba mogatagafi, owa'atin*

*(Mt 24:36-44; Lu 17:26-30,34-36)*

**32** “Owa' anin epen negawa nemaf afamba hiahaom amamba mogatagafia, owa'. Amom ensel magape heveni maloma ae' Nogama Godi afa' wapani ina ogawaf, owa'. God atona nogawa nemaf afamba. **33** Ipa' ina pegawa hiahaom amamba nambai' motaga, owa'. Ipa' solawaipa,

pindumafuma andeande' pendape.\* <sup>34</sup> Ipa' peme' anif basef waminif atin dei' iga'ipipafi. Nemaф afamba si'i anona aman nakwaha ipat ananitai nagafe' anagon. Anennofalai amom manda' maola anini mafi'i nawaloga maol nagaso'am atona atina mugumafi hiahawes ananisi. Ea' na'ipa aman nugumafi utai ma nugumafiata andeande'.\* <sup>35</sup> Ea' ipa' solawaipa andeande'. Ipa' ina pegawa nambai' Dembinai nugumafi ipati nugafi'i. Atiasi nifi'i wambomota a'a amanota a'a lalamota awatagw gogata, a'a kuhimbita atota, ipa' ina pegawam, owa'. <sup>36</sup> Na'amba anen nifi'i kwafalis atis niti ipa' ata' pe'eh atin. <sup>37</sup> Basef ifimba ae' agase'epaef ipe'i, ifimba ae' a'ipa amam nematawa hiasi hi'alas. Ipa' solawaipa andeande' pepe ma hiahaom ae' aga'ipipami mogataga."

## 14

*Amom dembami Juda ma'i moha Jisas nog'a'  
(Mt 26:1-5; Lu 22:1-2; Jo 11:45-53)*

<sup>1</sup> Anef nemaф bu'wafi sa'i Pasova ma esis Juda sonda' anis gwa'aisi lu'wasi soga' anota bret owa' togatef lu'utaia. Nimaguf bif ata' fape ma nemaф afamba bu'wafi sa'i soga' gwa'aisi Pasovaeфи. Afamba amom dembami magawalipasa mu'uli Godi maloma anom pris dembami ma'i monda' uhuf mefe'ma mombalo' Jisas mohana nogaga'\*. <sup>2</sup> Amom ma'ias na'amba ma'i, "Nemaф afamba sanda' gwa'aisi lu'wasiafi afa' ina ombalo'ana,

---

\* **13:33** Mt 25:14   \* **13:34** Lu 12:38   \* **14:1** Mk 11:18

hapainai. Na'amba epes hiasi ukup awep sohafel sonda' wandaf."\*

*Ano'w nemata'w kwakolo'sanda newala balaga Jisasi*

(Mt 26:6-13; Jo 12:1-8)

<sup>3</sup> Nemaf afamba Jisas nafe' Betani, nape ipat anona aman Saimoni, fowa' aowas aunai nanda' alop ananipi pagambu'wi, ma dei' ambu'unai, Jisas ata' nape na' gwa'aisi atin, owa' ano'w nemata'w kwahapila anol botol sanda'al si'i otami, sanda alogw fasigwi gwagani sagatalin otamba lu'umbai nala botol alamba, agilina nad. Ea' kopalia botol alamba kwakolo'wan newala balaga Jisasi. <sup>4</sup> Owa' anis epes sape satolom sa'i, "Dei' maina kwagakolo' sanda inimba dowadowaf?"

Ea' esis ukup numbutip kwapete' ma ako'w, <sup>5</sup> sa'i, "I'i afa' ofa'ana anis epes soso'afa moni nikila' 300 kina sotalina ofa'an ogaso' epes isimba kwahusa gwa'aisi mainai, dao' andeande'. Apa' owa' owa'atin."

Esis ukup numbutip a'owa' sapoma nemata'w akwamba.

<sup>6</sup> Ea' Jisas na'ipas na'i, "Ipa' ina a' ukup aoma ako'w, owa'i. Ako'w kwanda' waf fasifima ae'."

<sup>7</sup> Isimba gwa'aisi main akasi lifilafi sape dowaf salomepa. Nemaf mamahefa pi'i petopalopas pegaso'as moni, andeande', pese'asan. Epes isimba gwa'asi main akasi sape salomepa nimaguf hiafi, apa' ae' owa'. Ae' ina elomepa egape nimaguf hiafi, owa'!.\* <sup>8</sup> Maol inimba ako'w kwogawan kwanda'ani, ako'w kwanda'an.

---

\* **14:2** Lu 7:37-38   \* **14:6** Diu 15:11   \* **14:7** Jo 19:40

Felefele'ma atiasi esis sehe egaga' ma sogawe matmata. Okom ako'umi mapoma felefele'ma egaga'. Na'amba dei' kofa'i sanda' inimba kwafi'i kwakolo'wan newala balaga ae'agai koko'walan newala alop ae'api. <sup>9</sup> Endilisi ae' a'ipipa, ganimba itap walemb hiagoma anaf siga'ipasa basef bu'wafi Godi, si'ipasa basef ako'ufi wapani ma ukup pegapoma, waf bu'wafi ako'w kwanda'meafi."

*Judas nandandepa Jisasa noso'amona agufumi  
mofa'ana mohana nogaga'*  
(Mt 26:14-16; Lu 22:3-6)

<sup>10</sup> Amam amamba Jisasi 12-pelaim anona amamunai agilinama Judas Keriotinai a nafe' gani amom pris dembami magapoma. Anen na'i ni'ipama Jisas atona nogapoma mofe' mogombalo'ana. <sup>11</sup> Amom mame' basef ananifi sonaham endilisi. Ea' ma'i basef mandame'maef na'amba ma'i, "Andeande', afa' a' ose'ena anin moni."

Ea' Judas na'i aho' a' nala' nolaoma ano'w ufia'wa nigihimba'mama Jisas amoma mogombalo'ana.\*

*Jisas na' gwa'aisi lu'wasi saga'i Pasovai naloma  
alipumi ananimi*

(Mt 26:17-25; Lu 22:7-14,21-23; Jo 13:21-30)

<sup>12</sup> Nemaf afamba sali' saga' gwa'aisi saga'i Pasovai esis sa' bret atamba owa' togatef lu'utaia, ea' saha sipsip nogami sondolalima Goda sonda' gwa'aisi isimba.

Ea' alipumi Jisasi mahali'ana ma'i, "Ina' na'i afa' ofe' ondondomba ipat anima?"

---

\* **14:11** Eks 12:6, 14:20

**13-14** Ea' Jisas na'ipa ananimi biam na'i, "Ipa' pefe' piwis gani wambel lu'wambili, piti anona aman ufia'w nofa' embel sospen lu'unai. Ea' pigi'mana pefe' piwis ipat atamba anen nefe' nogawisatai. Ea' pihali' ahama ipat atambai pi'i, 'Dembinai afa'inai na'ipafa na'i, ipat atamba esis saga'ohotai totawa ani? Anen na'l no'wa afa' atofa alipufai ope onda' gwa'aisi isimba Pasova.' **15** Ea' nihimba'mepa rum amamba lu'wami mape ilif, ea' sandombata tebol siaifah sa'oh atifis. Ipa' pendondombamafa gwa'aisi rum amamba."

**16** Ea' amom mafe' mawis wambel ambalemba mati hiahawes isimba si'i Jisas nali' naga'ipamasi ea' mandondomba gwa'aisi isimba Pasova.

**17** Ama wambomota felefele'ma owamb, Jisas naloma alipumi 12-pelaim mafe' mataga ipat atamba\* **18** mawis ata' mape ma' gwa'aisi atin, owa Jisas na'ipam na'i, "Ae' a'ipipa endilisi, anona afa'inai dei' nape nalomafa naga' gwa'aisii, atiasi a' nefe' nihimba'ma amom boumi ma ae' egapoma."

**19** Ea' amom mame' na'amba ukup amamipi a' nimanip ea' mahali'ana atona atin ma'i, "Ae' a'a ami?"

**20** Jisas na'ipam na'i, "Anona afa'inai nalome ae' wahapila bret wagalata disi, ea' anamba atona.

**21** Aho', ae' ataga epen egefa' alop epesi, atiasi anis epes sehe egaga', si'i Buk Baibel naga'iasa ae'. Apa' aman anamba nogawalapa ae' ma boumii, anen uwahipina endilisi. Atiasi hiahaom awami endilisi a' motagamana. Fowa' ma'mana owa' ata' kolana ai, dao' a' andeande'. Ama anen ina a'

---

\* **14:17** Sam 41:9

notagama hiahaom akafimi amamba awami ea' hapaimi. Owa', a' owa'atin."

*Jisas naso'ama bret taloma embel wain alipumi ananimi*

(Mt 26:26-30; Lu 22:15-20; 1 Ko 11:23-25)

<sup>22</sup> Jisas nalomam ata' mape ma' gwa'aisi atin, ama main, nasa'ma anota bret, nandabeten nanifela God, nawalota naso'am na'ipam na'i, "Ipa' sa'mata pea'ata. Bret atamba alop ae'api."

<sup>23</sup> Ea' nasa'mai anop kap embel wain bagalapi nandabeten nanifela God naso'amambel amom hiami ma' embel atin.\* <sup>24</sup> Ea' na'ipam na'i, "Embel ambalemba esimbel ae'ambeli begewa' banaga basef ifimba God nagala' lapafi dambai. Ae' ekolo'wambela egatopalopa amam nematawa hisasi. <sup>25</sup> Ae' a'ipipa endilisi, ae' ina ata' itanima ia' embel wainimbrel wapani, owa'. Efe' etaga anamba God nagala'ambemagoma dao', a' ia' anin wain dambaini." <sup>26</sup> Amom manda' anof awaf ea' mawisi a' mafe' mondowasa' halafuta Oliv.\*

*Jisas na'i Pita atiasi a' nowa'ana alafuga*

(Mt 26:31-35; Lu 22:31-34; Jo 13:36-38)

<sup>27</sup> Ea' Jisas na'ipa amom alipumi na'i, "Fowa' gani Baibel naga'i na'amba na'i, God na'i, 'Anaf owagama gani, ae' a'eha aman anamba nugumafi sipsipi noga'. Ea' sipsip amamba atiasi a' mofa' mofe' atona biana.' Atiasi ipa' a pekwhaha pigahapifa ae' pefa' pefe' atona biana, si'i fowa' God naga'ias.\*

---

\* **14:23** Sek 9:11; Jer 31:31-34; 1 Ko 10:16; Hi 9:20      \* **14:26** Mk 14:50; Sek 13:7      \* **14:27** Mt 28:16; Mk 16:7

**28** Apa' owa' owa'atin, atiasi ae' itanima esafel wapani, ili'ipa efe' itap lu'upa Galili."

**29** Ea' Pita nagwamana na'i, "I'i amom hiami ine'imi mogawkaha ine'ma, hapaimi, apa' ae' owa'atin."

**30** Ea' Jisas nagwamana basef na'i, "Ae' a'ipina endilisi, dei' owamb amba'e, awata ata' owa' tota bifa, ina' a' nendahali'mi ni'ias wanif ni'i, 'Ae' owa' egawa Jisasa.' "\*

**31** Owa' owa'atin. Pita dindinapina na'ipana banagambel na'i, "Owa'atin. I'i esis sogahafa, afa' biafa oga' atin. Ae' ina a' indahali'mina, owa'atin endilisi."

Ea' alipumi hiami Jisasi ma'ias na'amba atin hi'alam.\*

*Jisas nape anagon Getsemani nandabeten nahali' God*

(Mt 26:36-46; Lu 22:39-46)

**32** Jisas naloma alipumi ananimi mafe' mataga itap Getsemani, ea' na'ipam na'i, "Ipa' pepe na'a. Ae' cefe' gani wa'ol endabeten ihali' God."

**33** Jisas nao'wa Pitai Jems a Jon mafe' malomana. Ea' opaf Jisasi a' aof kwapete'af\* **34** na'ipam na'i, "Nembel ae'ambili a' nimanimbil a'owa', ma a' egaga' nomonas ae'asi a' awes endilisi. Ipa' pepe na'a silisilawi pepe pesasae igitanimai."

**35** Ea' Jisas nandambemef nafe', nambe' opaf na'oh itap nahali' God. Na'i notofa hiahaoi awami amamba anen atiasi nogame'agamami.\*

**36** Ea' nahali' God na'i, "O, Ahame ina' banagini

\* **14:30** Jo 11:16 \* **14:31** Jo 18:1 \* **14:33** Jo 12:27 \* **14:35**

Ro 8:15; Ga 4:6; Mk 10:38; Jo 6:38

ma nanda' hiahaom hiami hi'agalami. Nekwa-home kap apamba. Apa' owa', ina' nindaila okom ine'imi atom, ae' owa'."

<sup>37</sup> Anen nahali'ana ea', nosafel notanima nafe'ma alipumi ananimi magapoma. Nafe' natolom owa', nati amom ma'oh maga' mafe'. Ea'nofala Saimon Pita na'i, "Saimon, ipa' ata' owa' pepea, panda'oh atin a'amom? Dei' maina ipa' owa' banagepama pepe pegasasa ae'a? Nogota ina laota ma a'ipipa a'i pepe pegasasa ae', owa'. Nogota bandata si'i awa atitin.\* <sup>38</sup> Ipa' solawaipa pepe pendabeten. Na'amba hiahaom mogogwambipai a' motagamepa. Endilisi ukup ipe'ipi pa'i awima pendabeten, apa' alop owa' banagepa, ala'uta tahepa, ma pendabeten pegalome."

<sup>39</sup> Jisas na'ipam na'amba ma ea', a' notanima nafe' nahali' God. Nahali'anama basef ifimba atif nali' nagahali'anamafi. <sup>40</sup> Nahali'ana ea' nadambemef notanima nafi'i amom magapoma nati ata' ma'oh atin. Ea' ninimbalom mosafel ma'i, "Atiasi afa' wi'ipana basef maif?"

Ambeh lu'wambihi haham ea' ma'oh maga' mafe'. <sup>41</sup> Anen nandambema notanima nafe' wapani nahali' God si'i doko' nali' nagahali'ana bif. Ea' notanima nafi'mai amom na'ipam na'i, "Ipa' papoma noma'w pa'oh atin? Dei' ipa' koh ea', safel. Dei' nemaf afa'e anona aman a' nifi'i nulawai anom amam awami mufi'i mowa' ae' ataga epen egefa' alop epesi. <sup>42</sup> Safel! A' ofe' uti aman anamba nigihimba'mama ae'i dei' a' nafi'i."

---

\* <sup>14:37</sup> Lu 11:4

*Judas nawalapa Jisasa amom boumi  
(Mt 26:47-56; Lu 22:47-53; Jo 18:3-12)*

**43** Jisas ata' nalutu na'ipam atin, owa' anona aman a' nafi'i. Aman anamba Judas anona amom 12-pelaim ananimi nafi'i nalumai amam hiami mahapila bainagwi belep malomana mafi'i. Amom pris dembami malumai agufumi dembami esis Judai masapa'am mafi'i.

**44** Ea' aman anamba nagawalapa Jisasi, nali' na'ipam nanda' ametal nihimba'mam na'i, "Atiasi piti aman anamba ae' igasisi'a dialogwanai, ea' Jisas anamba ma'unna. Ipa' hapilana pewa'ana andeande' pefa'ana pefe!."

**45** Amom ata' mataga atin, owa' Judas nafe'ma Jisas na'ipana na'i, "Tisa dembinai."

Ea' nasisi' dalot Jisasi. **46** Ea' amom mowasa' lagof mombalo' Jisas. **47** Owa' anona aman naga-lutu felefele'ma Jisasi nagiai bainat naha anona aman nanda'mana maola pris dembinai nepe nagali'ma pris hiamii, natopa' aliga ananigai pele'atowaga gowa.

**48** Ea' Jisas na'ipa amom boumi na'i, "Ipa' pefa'i bainagwi belep pafi'i pa'i pegewa' anona aman aunai nanda' wal napa' nagaloma gavmani a'a?\*

**49** Nimaguf hiafi ae' ape alomepa ipat lu'unai Godi awalapa basef bu'wafi ma esis aman nematawa hiasi, ipa' owa' pembale'ea. Apa' dei' paila basef fagape Baibeli pafi'i pewa'e si'i basef fowa' Faga'ias. Ae' a'i basef ifimba dei' fetaga endilisi a fela gwa'aisi."

---

\* **14:48** Lu 19:47, 21:37; Jo 18:20

**50** Ea' alipumi ananimi hiami makwahona mafa' mafe' hi'alam.

*Anona aman sa'unai nafa' nafe'*

**51** Anona aman sa'unai nagi'ma Jisas nafi'i nowaho' anef lowaf afitifi ea' amom magahapila bainagwi bilipi ma'i mombalo'ana. **52** Owa' owa'atin. Anen nakwaha lowaf atef fa'oh a' nafa' nafe' dowaf.

*Amom mandakotima Jisas*

(Mt 26:57-68; Lu 22:54-55,63-71; Jo 18:13-14,19-24)

**53** Amom mofa' Jisas mafe'ma pris dembinai nape nagali'ma pris hiamii. Anen naloma amom pris dembami maloma anom dembami daiam magawalipasa mu'uli Godi amom hiami mandakolas atogon. **54** Ea' Pita ina nalomam atef nafe', owa'. Anen nagigi'mam nafe' nawis indalelemba pris anamba dembinai ea' nape naloma polisman mapoma nif. **55** Ea' amom pris dembami maloma anom dembami Juda hiami mugumafi kota ma'i molaoma anis epesa sombaso'am sogas-apaga Jisasa anif basefa, mohana nogaga'. Owa', amom ina mati anif, owa'atin. **56** Esis hiasi sambaso'mana sasapagana dowaf, apa' ina sa'i endilisifi fafe' atifiggin, owa'. Sa'if fandafe' daindai.

**57** Owa' amom daiam malutu masapagana mambaso'mana ma anif basef na'amba ma'i,\* **58** "Afa' wame' Jisas na'ias na'amba na'i, 'Ipat Godi lu'unai epes sanda'anai, atiasi ae' igulatana, ma nimaguf wanif a' esa'mana notawa wapani. Apa' ae' ina enda' lagof esa'mana, owa!.' "

---

\* **14:57** Jo 2:19-21

**59** Ea' basef ifimba amom maga'iefi ina ma'i endilisifi fafe' atifigin, owa'. Ma'if fandafe' daindai. **60** Ea' pris anamba dembinai nalutu la'afen nahali' Jisas na'amba na'i, "Ina' negwa basef ifimba, a'a owa'? Dei' maina amom maga'ipina basef na'amba??"\*

**61** Owa', owa'atin. Jisas nasopama malagol nalutu. Anen ina nagwamana basef anen, owa'. Na'amba pris anamba dembinai nahali'ana wapani na'i, "Ina' Krais aman anamba God nasapa'ena nagafii a'a owa'? Ina' Nogamana God apa' manda' lotumanai, a'a owa??"

**62** Ea' Jisas na'i, "Endilisi ae' ma'uwi. Anaf owagama ipa' apiti ae' ataga epen egefa' alop epesi epe lagol kwahisigili Godi banagewe epe otaga ilif itanimai ifi'i petolowe."

**63** Jisas na'ias na'amba owa', pris anamba a' okom wandafuna ea' nahape' lowaf anen nagalafi na'ias na'i, "Apa' ina ata' mofalai anis wapani sifi'i si'i anif basefa anen, owa'atin.\* **64** Anen nanda' God findiwana ea' ifimba apame'ef. Dei' ipa' ukup pape pa'imama?"

Ea' amom hiami ma'i anif basef mandame'maef ma'i, "Anen nanda' waf awafi andeande'ma mohana nogaga!." **65** Ea' anom mosafel misisi'wafana masopama naep ananipi mahana ma'ipana ma'i, "Ni'i basef si'i profet newalapa wagahinai ami nahena?"

Ea' amom polisman mafi'i mahana a' mofa'ana mafe'.

---

\* **14:60** Mk 15:5; Lu 23:9    \* **14:63** Jo 19:7

*Pita nambaso'mas nandahali'ma Jisas  
(Mt 26:69-75; Lu 22:56-62; Jo 18:15-18,25-27)*

**66-67** Ano'w nemata'w kwanda'mana maol pris anamba dembinai kwafi'i kwati Pita napoma nif ipat ando'. Ea' kwalutu naep do'a anen, kogawana kwa'ipana na'amba kwa'i, "Anina ina' nape nagaloma Jisas Nasaretinai."

**68** Ea' Pita nandahali' na'ipa'w na'i, "Owa!. Ae' ina egawa basef kofagefa ina' naga'iefi."

Ea' anen nosafel nefe' felefele'ma indambel uta, anota awata atata. **69** Ea' nemata'w akwamba kwatolona kwa'ipas wapani isimba sagalutu felefele'i kwai'pas na'amba kwa'i, "Aman anamba wapani alipunai nagaloma Jisasi."

**70** Owa' Pita na'ias wapani na'i, "Ae' ina egawana, ae' owa!."

A'i owa' nogota laota kwasakwasala, owa' anis sagalutu felefele'i sa'ipa Pita wapani sa'i, "Endilisi, ina' alipinai nagaloma amom Jisasi. Ina' wapani aman Galilinai."

**71** Dei' Pita nandahali' na'i basef banagafi na'i, "Endilisi ilif, ae' ina egawa aman anamba ipa' pagal'ianai, owa'atin."\*

**72** Anen na'ias ea' owa', awata atata bif ea' Pita a' okom mandanda'ma basef doko' Jisas na'ipanaef owambi naga'i, "Awata owa' ata' tota bifa, ina' nembaso'mas ni'ias wanif ni'i, 'Owa' negawea.'"

Ea' Pita okom mandanda'ma basef ifimba ea' nalef mehip.

\* **14:71** Mk 14:30

## 15

*Amom mofa' Jisas mafe'ma Pailat manda'mana basef*

(Mt 27:1-2,11-14; Lu 23:1-5; Jo 18:28-38)

<sup>1</sup> A'i owa' kuhimbita atota amom pris dembami maloma anom dembami daiam Judai a amom dembami magawalipasa mu'uli Godi, maloma anom Juda dembami mugumafi koti, amom hiami mandakolas maila basef atifif. Amom mowa' Jisas mofa'ana mafe' maso' gavman dembinai Pailat.\*  
<sup>2</sup> Ea' Pailat nahali'ana na'i, "Ina' king dembinai Judai a'a owa'?"

Jisas nagwamana basef na'i, "Basef ifimba ina' naga'iefi endilisifi."

<sup>3</sup> Ea' amom pris dembami masapaga Jisasa basef hiafi. <sup>4</sup> Na'amba Pailat nahali'ana wapani na'i, "Ina' owa' negwa anif basefa? Ina' neme'. Amom manda'mena basef hiafi ma ina!."\*

<sup>5</sup> Owa' Jisas ina nagwa anif basef wapani, owa'. Na'amba Pailat nomonas salasafe' hiahias.

*Pailat na'i esis sondola Jisas lawag usi'igai ti'wanaegai sohana nogaga'*

(Mt 27:15-26; Lu 23:13-25; Jo 18:39-19:16)

<sup>6</sup> Nemaf afamba esis Juda sanda' anis gwa'aisi lu'wasi saga'i Pasovai. Afagof danda ma nemaf afamba danda'afi Pailat nanda'as na'amba. Anen nakwahowa anona nagape kalabusi nafe' wahifina. Aman ami esis amam nematawa saga'ianai, Pailat name'asa nakwahona nafe'mas. <sup>7</sup> A'i owa' nogota atamba anona aman nagape kalabusi ag-ilinama Barabas. Anen nanda' kalabus naloma

---

\* 15:1 Lu 22:66    \* 15:4 Ais 53:7; Mk 14:61

anom amam mapa' magaloma gavmani maha anis sagaga'i. <sup>8</sup> Ea' esis hiasi safi'i salutu sofala Pailat sa'ipana sa'i, "Ina' nekwahowa anona aman nagape kalabusi nifi'mai apa' wahifina si'i afagof danda nanda'am."

<sup>9</sup> Ea' nagwamasa basef na'i, "Dei' ae' ekwahowa king dembinai ipa' nefe'mago ipa', a'a ami?"

<sup>10</sup> Dei' main, Pailat anen nogawa amom pris dembami kowalamo epes hiasi sagaila basef Jisasi ukup aom atom mapomana dei' manda' kotimana.\*

<sup>11</sup> Ea' amom masa'ma nomonas amam nematawa hiasi ma sogahali' Pailata nogakwaha Barabas atona nogafi'mai esis.

<sup>12</sup> Ea' Pailat na'ias wapani na'amba na'i, "Atiasi ipa' pa'i ae' enda'ana i'imamana aman anamba ipa' pegefalona paga'i king dembinai esis Judai?"

<sup>13</sup> Ea' esis gigal sa'oh mehip sa'i, "Dolana lawag hana nogaf!"

<sup>14</sup> Ea' Pailat nahali'as na'i, "Dei' main? Anen nanda' waf maif awafi?"

Owa' esis gigal sa'i mehip sa'i, "Dolana lawag hana afuna!"

<sup>15</sup> Ea' Pailat na'i nila nomonas asasisi. Ea' nakwahowa Barabas nafe'ma esis na'ipa amom soldia ma mogopagaha Jisas mofa'ana mefe'ma mogandolana lawag usi'igai ti'wanaegai.

### *Amom soldia manda' Jisas findiwana (Mt 27:27-31; Jo 19:2-3)*

<sup>16</sup> Amom soldia mofa' Jisas mawisi ipat gavmani lu'utai. Ea' mofala anom soldia hiami mafi'i munduwa'anima ma anen <sup>17</sup> malamana

---

\* <sup>15:10</sup> Ap 3:13-14

saket akwahitai. Ea' mofa'i anona mando'f higatagunai manogana mala'watefana si'i hat mowalo'manana balaga ananigai. <sup>18</sup> Ea' malutu manda'ana findiwana ma'i, "Nemaf bu'wafi, ina' king dembinai esis Judai."

<sup>19</sup> Ea' amom mahana anota alifita balaga ananigai, misisi'wafana mindiwa nembawa motawa masa'ma agol ananigili dowaf. <sup>20</sup> Manda'ana findiwana ma ea', mowalimana saket atamba akwahitai, malamana lowaf ananifi mofa'ana mafe'ma mogandolana lawag usi'igai ti'wanaegai.\*

*Amom soldia mandola Jisas nail lawag usi'igai ti'wanaegai*

(Mt 27:32-44; Lu 23:26-43; Jo 19:17-27)

<sup>21</sup> Amom soldia mofa' Jisas mafe' ata' malo uphia'w la'afen, owa' matagama anona aman Saimon, nepe wambel ananimbili itap lu'upa Sairini nafi'i. Nogaopana ananimi biam Aleksanderi Rufus. Saimon napani alup nafi'i, na'i nefe' Jerusalem. Owa' amom soldia ma'ipana din-dinapa nogofa' lawag Jisasi. Ea' masapa'ana nofa'aga nafe'. <sup>22</sup> Ea' mofa' Jisas mafe' mataga anagon agiligima Golgota. Apa' dei' mambe-mefagol ma'i, Pipitagol Balagaigil.

<sup>23</sup> Ea' maso'ana anambel embel wain mambe-mam magaloma anona marasin agilina meri ma nea' embel begahagofa akep lu'wami. Owa' anen ina na'i aho' na'am, owa'. Nandaiwa'mam.\* <sup>24</sup> Ea' mandolana lawag usi'igai ti'wanaegai ma main, manda' satu ma luwaguf maim ananimi ma ami nigikila'i ma mofa'ef mondondamef atona atin.

---

\* **15:20** Ro 16:13 \* **15:23** Sam 22:18

**25** Kuhumbita awin ata' natafi nainaili 9 klok, soldia mofa' Jisas mafe' mandolana lawag agamba. **26** Amom mofa' anin pepa basef ifimba doko' amom Juda magasapaga Jisasafi Pailat nanda'ef fagaili fa'i, "Anamba dembinai king esis Judai." Amom manda' basef ifimba fail balaga Jisasi lawag ilif. **27** Felefele'ma Jisas nagaima, amom soldia mandola anom biam manda' waf awafii manda' wali. Amom mandola Jisas nail la'afen, ea' mandola amom biam mail wa'owa'ol.\* **28** [Na'amba si'i anif basef Baibel naga'iefi dei' afataga alihif fandawalap. Basef ifimba faga'i na'amba fa'i, "Anaf esis nomonas sopoma anen noloma amom amamba manda' waf awafii."]\*

**29** Ea' anis amam nematawa safi'i kilikila' sagaili sanda' salamala anen, sapapati balagah sa'ias na'amba sa'i, "Awi, ina' aman nigugulata ipat anamba dembinai Godi, ma netanima negasa'mana nimaguf wanifi, **30** dei' netopalopa ina' nendatagwah nisila'i."

**31** Ea' amom pris dembami maloma amom dembami magawalipasa mu'uli Godi hiami malomam malutu manda'ana findiwana ma'i, "Anen nandatopalopa anis daindaias, apa' dei' ina natopalopa anen, owa'atin. **32** I'i aman anamba Krais Dembinai esis Israeli, anen nokwaha lawag nisila'i ma motolona mogahapifana."

Amom biam sandolam magaloma Jisasi wapani manda'ana findiwana ma basef awafi.\*

*Jisas a' naga'*

*(Mt 27:45-56; Lu 23:44-49; Jo 19:28-30)*

\* **15:27** Ais 53:12

\* **15:28** Sam 22:7; Sam 109:25; Mk 14:58

\* **15:32** Emo 8:9

<sup>33</sup> Awin nandasapa' akot lu'unai a' nataga itap hiagoma esis Judai akotigin. Akot a' nape nafe' nafe' ma awin nandambema 3 klok wambomota. Ea' awin nataga negala' wapani.\* <sup>34</sup> Awin nandambema 3 klok, Jisas noga na'i mehip na'i, "Eloi, Eloi, lama sabaktani?"

Apa' mambemef ma'ias na'amba ma'i, "God ae'inai, God ae'inai, dei' maina ina' nagakwahowe?"

<sup>35</sup> Anis epes salutu felefele' same' anen na'ias na'amba sa'i, "Peme'. Anennofala anona profet Elaija."\*

<sup>36</sup> Ea' anona aman nasagih nafe' nofa' anom mosong magape naohi nalam mowala embel wainimbel numbutimbeli nagiam nasapa'am anagol bagol nadowam mafe'ma Jisas noga' embel. Ea' aman anamba na'ipas na'i, "Ipa' ata' ota' atiasi muti Elaija nifi'i notagwahona nisila'i a'a owa'?"

<sup>37</sup> Ea' Jisas galala mehip ea' naga' dogw. <sup>38</sup> Ea' dei' anona lowaf lu'unai si'i utai negetao ipat Godi lu'unai nomoni palalana gani ilif nowala itap nataga biafina. <sup>39</sup> Ea' kepten anamba dembinai nugumafi soldia hiamii, nalutu felefele'ma Jisas nati anen naga' na'amba ea' na'ias na'i, "Endilisi atis, aman anamba nogamana Godi."\*

<sup>40</sup> Ea' anowa nematawa walutuwu laogon wagatologinii awamba. Ano'w Maria Makdalai'wi a ano'w agol atogol Maria ma'ma Joses naloma Jems sa'unai a' ano'w Salome.

---

\* <sup>15:33</sup> Sam 22:1

\* <sup>15:35</sup> Sam 69:21

\* <sup>15:39</sup> Lu 8:2-3

**41** Fowa' Jisas ata' nagape Galili, awo wagawa-gaila anini ma wagatopalopana ma anis hia-hawea gwa'aisi mais. Anowa hiawai wapani walomana ondondowasa' Jerusalem.

*Amom mawa Jisas anona otam lu'unai nagal nagawis nomoni*

(Mt 27:57-61; Lu 23:50-55; Lu 19:38-42)

**42-43** A'i owa' wambomota felefele'ma owamb, Josep Arimateainai nafi'i. Anen dembinai ma kot esis Judai, agol lu'wagilinai. Nape nohafa nemaf bu'wafi fegataga ma hiasi sogawis nomona maol Godi nope Dembinai nugumafias. Dei' sanda' hia-haom gwa'aisi mais dumbulidombola naman nemaf afamba sabat fegataga. Ea' Josep nafe' nawis nalutu naep Pailati. Anen ina ombal mahana, owa'. Nahali'ana ma nofa'i alop Jisasi nogawana. **44** Na'amba Pailat agogolalasona okom ma'i Jisas ina dei' a' afuna endilisi, ata' owa'. Ea' nofala anona dembinai soldia nafi'i nahali'ana na'amba na'i, "Jisas a' naga' ea' a'a owa'?"

**45** Soldia anamba na'ipana na'i, "Jisas a' naga' endilisi ea'."

Ea' Pailat na'ipa Josep na'i, "Dao' ina' nefe' nef'a' alop Jisasi."

**46** Fowa' anis sanda' anota matmat sagwasa otam lu'unai nagal nawis nomon. Ea' dei' Josep na'i nowa Jisas matmat atamba. Ea' nafe' notala anona lowaf afitinai nafi'i natagwaha alop Jisasi nisila'i ma nanda' lowaf anamba nowa'ana ma ea', nasapa'ana nawis matmat atamba nalana nomon. Ea' nambema anona otam lu'unai nafe' nowalo uta matmat atamba. **47** Anowa nematawa biawa Maria Makdalai'wi kwaloma Maria ma'ma

Josesi, awo walutu watologon wati anamba Josep nagawa Jisasa.

## 16

*Jisas notanima nosafel wapani  
(Mt 28:1-8; Lu 24:1-12; Jo 20:1-10)*

<sup>1</sup> Nemaf afamba sagapoma noma'wafi afafe' hi'alaf, Maria Makdalai'wi kwaloma Maria ma'ma Jemsi waloma Salome watala anom wel alogw fasifasimi maga'ami. Awo wa'i ofa'am ofe' ondisa alop Jisasi. <sup>2</sup> Wafilu nemaf Sande, kuhimbita atota awo ofa' wel alamba wafe' matmat. <sup>3</sup> Awo ata' wafe' atin ufia'w, wanda'ipama na'amba wa'i, "Atiasi ami netopalopafa nelefata otam anamba nogowalo utai?"

<sup>4</sup> Ea' watologon owa', wati otam amamba lu'unai ina ata' mape mowalo uta, owa'. Anin epen a' nafe' nawisi'am mafe' ma'oh wa'ol.

<sup>5</sup> Awo wawis matmat nomon, wati anona aman sa'unai tol nape uta wa'ol lagol kwahisigilima. Nala anona lowaf launai afitinai. Na'amba awo gogolalasowa kwapete' ombel mahawa.

<sup>6</sup> Ea' anen na'ipawa na'amba na'i, "Ipa' ina a' ombel mehepa, owa'i. Ae' egawepa ipa' pa'i pifi'i pelaoma Jisas Nasaretinai, esis sandolana naga' lawag usi'igai ti'wanaegai. Anen a' notanima nosafel ea', ina ata' nape na'a, owa'. Ipa' piti na'a sofa'ana sawisi salana nagalama. Dei' a' wafigin nape.\* <sup>7</sup> Ea' ipa' fo'o pi'ipa alipumi ananimi ea' pi'ipa Pita nalomam na'amba pi'i, 'Jisas a' nali'ipa

---

\* **16:6** Mt 26:32; Mk 14:28

nefe' itap apamba Galili. Ipa' pefo'o petolona si'i nimbewa' naga'ipipa.' ”

<sup>8</sup> Ea' wakwaha matmat wawisi ando' a' wafa' wafe'. Awo ombel mahawa wanda'am bombol atin. Ea' awo ina wa'ipasa basefa anis epes, owa'atin.\*

*Maria Makdalai'wi kwati Jisas  
(Jo 20:11-18)*

<sup>9</sup> [Jisas notanima nosafel Sande kuhimbita atona, ea' nali' natagama Maria Makdalai'wi, fowa' nagatofama'wa ambagof awami 7-pelaim magapau'wi.\* <sup>10</sup> Ako'w kwafe' anagon alipumi Jisasi magapoma. Nomonas amamisi nimanis a'owa', mape malef. <sup>11</sup> Ea' kwa'ipam kwa'i, “Ae' ati Jisas a' notanima nosafel wapani nepe namona.”

Amom mame' basef ifimba ako'ufi, apa' ina mahapifa'w, owa'!

*Amom biam alipumi Jisasi matolona ufia'w kwagafe' Emeusi  
(Lu 24:13-35)*

<sup>12</sup> A'i owa' main, anom alipumi Jisasi biam makwaha wambel lu'wagoma maila ufia'w kwagafe' alupi mafe'. Ea' Jisas nandati na'a nefe' natagamam. <sup>13</sup> Amom biam matolona motanima mafe' mawalapa basef ifimba ma alipumi du'wanim magapanii, apa' amom ina mahapifam, owa'atin.\*

*Jisas naso'ama maol amom alipumi ananimi  
(Mt 28:16-20; Lu 24:36-49; Jo 20:19-23)*

---

\* **16:8** Lu 8:2   \* **16:9** Mt 28:10   \* **16:13** 1 Ko 15:5

**14** A'i owa' main, alipumi 11-pelaim Jisasi mape ma' gwa'aisi atin, Jisas nafe' natagamam. Nimbewa' anis satolona notanima nogosafel wapani ea' sa'ipamana, apa' owa'. Amom ina mahapifas ma'i sa'i endilisi, owa'. Ma'i owa' sambaso'mam atin. Ea' Jisas nanda' megahaham.\*

**15** Ea' na'ipam na'amba na'i, "Ipa' pefe' walemb hiagoma pi'ipasa basef bu'wafi Godi ma amam nematawa hiasi hi'ilas.\* **16** Epes ami sagahapi-fai sofa' baptais, anaf God a' notanima nofa'asi wapani ea' ananisi. Apa' isimba owa' sogahapi-faea, anaf God a' nonda'mas kota basef lu'wafi ma waf awafi esis sanda'afi.\* **17** God atiasi nonda' esis isimba sogahapilafi banagesa sonda' anom hiahaom banagami si'i anen nanda'ami. Ea' sohali' ae' ma esis banagesa sigali'amona ambagof awami magapaisi, a si'i anona diga hianai dambainai.\* **18** Ea' sohapila uguf fagahasi lagof asasimi apa' ina a' fohas soga', owa'. Ea' soga' embel numbutimbeli wapani, esis ina a' soga', owa'. Apa' anis owa' sogahapifaea, soga' embel ambalimbai, a' soga'. Ea' atiasi esis isimba sogahapifai sosa lagofa anis aowas nanda'asi ambo'wes wapani."\*

*God nofa' Jisas nalota heven  
(Lu 24:50-53; Ap 1:9-11)*

**19** Dembinai Jisas nawalipas na'ipas ea', God nofa'ana nalota heven. Ea' nofa' agol lu'wagili nape lagol kwahisigili Godi banagagili.\* **20** Ea'

---

\* **16:14** Ap 1:8   \* **16:15** Ap 2:38   \* **16:16** Ap 2:4; Ap 8:7, 10:46

\* **16:17** Lu 10:19; Ap 28:3-6   \* **16:18** Ap 2:33-34   \* **16:19** Ap 14:3; Hi 2:3-4

alipumi ananimi a' mafe' ganimba walemba  
hiagoma mawalapa basef Godi. Anen nowa'  
banagama manda' maol banagani si'i God  
nanda'ani. Anis dais sati maol inimba sa'i,  
“Endilisi atis, God natopalopama basef bu'wafi  
endilisi.”

Basef ifimba ea' ma'uf.]

**Basef Bu'wafi Godi  
The New Testament in the Mufian Language  
Nupela Testamen long tokples Mufian long Niugini**  
copyright © 1998 Wycliffe Bible Translators, Inc.

Language: Mufian

Dialect: Mufian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

---

PDF generated using Haiola and XeLaTeX on 21 Feb 2024 from source files  
dated 31 Aug 2023

b0cff915-4005-598f-9bbc-38b1e35d47b1